

## **ASO LUA, 18 AOKUSO 2020**

*Na nofoia le Nofoa e le Fofoga Fetalai i le itula e 9:00 i le taeao e tusa ai ma Polokalame o Fonotaga a le Palemene 2020/2021.*

Tatalo.

**FOFOGA FETALAI:** Ou te faasilasila atu ua toe amatalia nei Taulumaga ma Galuega a le Fono Aoaofa Fautulafono.

### **FAAALIGA MAI LE TAITAI O LE MAOTA**

E tusa ai ma le Tulafono Tumau 76 a le Palemene ua tuuina atu nei le Faaaliga i le Fono Aoaofa Fautulafono mo le iloiloaina o le Tulafono Tau Faaofi ua faaaliga iinei:

1. Tulafono Tau Faaofi o Teuteuga o le Tulafono o le Faasologa o Tiute 2020.
2. Tulafono Tau Faaofi o le Ulufale mai o Tagata 2020.

**TUUINA ATU** i lenei aso 17 o Aokuso i le tausaga 2020.

Hon TUILAEPa Dr. Sailele Malielegaoi

### **TAITAI O LE MAOTA**

**FOFOGA FETALAI:** Avea ia lenei avanoa ou te faatalofa atu ai ma le agaga faaaloalo i le paia o le palemene ua potopoto i lenei taeao, malo le lagimama, ua faamalo foi le soifua manuia. Tatou te momoe ma manu e le fati, ae sau lava mala e atiae i lo outou soifua ma le tatou ola. Peitai, ana le seanoa le Atua na ia i tatou, tatou te le maua le filemu ma Lona matagofie ma lenei taeao i le lagimama ma le soifua manuia.

E faatalofa atu foi i Ofisa Sili o Pulega o Matagaluega ma Faalapotopotoga a le Malo, aemaise o i latou uma o lo o faapena ona tofusao i le atiaeina o le atunuu. E faapea foi ona faatalofa atu i le tapuaiga a Samoa e amata mai ona ao seia oo i ona iu, ae le gata i lea, o Taitai o Ekalesia e fia ma feoi o le

talalelei o lo o faapena ona tatalo i le po ma le ao, ao ma le po, aua se manuia o Samoa.

## **ISI FAASILASILAGA A LE FOFOGA FETALAI**

### **1. AVANOA AI O LE NOFOA O LE FONO AOA O FAITULAFONO**

**FOFOGA FETALAI:** E tusa ai ma le Mataupu 46(3) o le Faavae o le Malo Tutoatasi o Samoa, ma aiaiga o le Fuaiupu 141(2) o le Tulafono o Faiga Palota 2019, ou te faasilasila aloaia atu ai, ua avanoa nei le Nofoa o le Palemene mo le Itumalo Palota o Gagaifomauga Nu.3.

O le avanoa ai o se nofoa o le Fono Aoa o Faitulafono e tusa ai ma aiaiga o le Tulafono o Faiga Palota 2019, e aofia ai;-

- (a). Ua avea se Sui Usufono e tusa ai ma le Fuaiupu 140, ma ua faamavae mai lea Sui Usufono mai se Vaega Faaupufai a o faagasolo le Paeaiga o le Palemene; po o
- (e). o lo o faaauau pea ona avea ma Sui Usufono a o faagasolo le Paeaiga o le Palemene e avea ai ma Sui po o se Sui Usufono o:-
- (i). se Vaega Faaupufai po o se Faalapotopotoga lea e i ai a latou sini autu faaupufai ma o lo o mananao e auai i se faiga palota pe afai o sea Vaega Faaupufai po o lea Faalapotopotoga e le i faamauina e avea ma Vaega Faaupufai i lalo o lenei Tulafono; po o
- (o). se Vaega Faaupufai ua faamauina e ese ai na i lo le Vaega Faaupufai ua faamauina lea e avea ai o ia ma Sui Usufono o le Palemene, ina ua faia lana tautoga o le loto faamaoni.

Ua faaooina mai le Tusi Faamavae a Le sa tauaveina le Tofi o le Itumalo, ua faamavae aloaia mai ai i le Palemene. Ua maea foi ona faalauiloa lona faamoemoe i le resitalaina ma le faavaeina o se Vaega Faaupufai e le gata mo le Palota Laitiiti mo le Itumalo Palota o Gagaifomauga Nu.3, ae faapea foi mo le Faiga Palota a le atunuu lautele i le tausaga fou.

E manatu le Nofoa, o se avanoa lelei foi lenei e tuualalo ma faamanatu atu ai i Sui Usufono uma o le Maota, aiaiga o Tulafono ua maea ona pasia e le tatou Palemene, e pei ona limataitaiina ai lo tatou valaauina.

Ua maitauina foi ma le toto'a e le Nofoa, o lo o i ai lava nisi o Sui Usufono latou te le o amanaia ma manatu mama i aiaiga nei o Tulafono ua taoto, ma ua tauau ai ina faa-taologa i vai le faatauaina o a tatou Tulafono. O le faanoanoaga, o nei uiga faaalua ua atagia ai le manatu mama i a tatou Tautoga

o le Loto Faamaoni na faia i luma o le Atua, aemaise o le tapuaiga mai a Samoa, aemaise o Itumalo sa filifilia i tatou e avea ma o latou Sui Usufono i totonu o le Palemene. O le ala foi lea e manatu ai le Nofoa, ia le avea le vaivai ma uiga le faamaoni ma le soonafai ua faaalua e isi Sui Usufono o le a avea ma mea e faatino ai aulape o Tulafono i le tuuaia o le Nofoa i se maitau mai o Samoa ma Itumalo ua filifilia mai tatou, ua faapito-augafa, sailiili masei ma se maitau laumata i se Faaiuga a le Nofoa i o latou vaivai. Peitai, ou te manatu tele i le tatou vafealoaloai ma le avafatafata e laualuga ai mea uma aemaise o le tapuaiga mai a Samoa ma o tatou itumalo na filifilia i tatou e avea ma o latou sui usufono. Ae a faatino foi aulape o Tulafono, ua na o se foe e faaee i le tau i lenei vaitaimi, aua o lele ua sina le galu aua le faamoemoe o le atunuu lautele e tauala i lana Faiga Palota Aoa o le tausaga fou. E i ai le manatu tatou te silasila totoa i ia tulaga, aua foi le avea le naunau i nisi o manatu e fai ma auala e galo ai le tapuaiga a le itumalo aemaise o Samoa.

Tatou talosia ia le agai atu o le Palemene i nai masina o totoe o lenei Paeaiga, ina ia faamaeaina i le alofa o le Atua ma maua ai se viiga o le Matai.

Avea foi lenei avanoa ou te faafetai atu ai i lau Afioga i le Minisita o le Soifua Maloloina, aemaise foi o le Ofisa Sili o Pulega ma le Matagaluega ona o le aso ananafi i le auaunaga faifaipea a le Matagaluega ua faapena ona maua ai le avanoa o sui usufono mamalu o le Palemene, aemaise foi o i latou uma o e na mafai ona maua le avanoa ananafi e siaki ai lo latou soifua maloloina, aua o le tele lava o taimi tatou te popona e ave le faamuamua i tiute ma feau ma galuega, ae galo ai ia i tatou lo tatou soifua maloloina. E momoli atu le faafetai ma ia faapena ona alofagia e le Atua ia maua pea le tofa maualuga i lau Afioga i le Minisita faapea le Minisita Lagolago, le Ofisa Sili o Pulega ma i latou o pulea le Matagaluega, aemaise le aufaigaluega.

## **2. TEUTEUGA O LE POLOAIGA O FAALAVELAVE FAAFUASEI.**

E faasilasila atu mo le silafia e le Palemene ua ou taulimaina nei Teuteuga o le Poloaiga o Faalavelave Faafuasei, e pei ona faamaonia e le O le Ao o le Malo.

Ou te tapa le Failautusi o le Fono Aoa mo le tolaulauina o nei Teuteuga ma faataatia i le luma o le Laulau a Fono a le Palemene.

*Na tolaulauina e le Failautusi le Teuteuga o le Poloaiga mo Faalavelave Tutupu Faafuasei.*

## **Teuteuga o Poloaiga mo Faalavelave Tutupu Faafuasei mo le Koviti-19**

### **Faatagaina o le Kamupani a le Petroleum Product Supply Limited mo le faatumuina o tane suauu mo Samoa i Aso Sa.**

Ona o lona tulaga faanatinati ua faataga ai le malaga mai o le vaa suauu e auina mai le suauu i laufanua o Samoa ona o tulaga maaleale o lo o i ai nei le suauu i le taimi nei.

#### **O vaega nei e moomia mo lenei galuega:**

1. E faataga ona galulue le kamupani Petroleum Products Supply Limited le PPS ma le Pulega o Uafu ma Taulaga mo le toe faatumuina o tane suauu mo Samoa faapea ma nisi vaa suauu e faamoemoe e taunuu mai i le atunuu.

O le a amata faamamaluina lenei suiga i le aso Tofi, 6 Aokuso 2020 seia toe i ai se isi faaaliga.

2. Le tuuina atu o le suauu mo le Faalapotopotoga Malosiaga tau Eletise le EPC i le aso Sa 16 Aokuso 2020 mo le gaosia o le eletise mo le atunuu.

O lenei faaiuga na faia i lona tulaga faanatinati e tusa ai ma le Vaega 38(1)(c) o le Faavae o le Malo Tutoatasi o Samoa. E faatumauina pea isi Poloaiga o Faalavelave Tutupu Faafuasei na muai tuuina atu.

O lenei poloaiga e amata faamamaluina i le aso 15 o Aokuso 2020 e pei ona faamaonia e Lana Afioga Tuimalealiifano Vaaletoa Sualauvi II, O Le Ao o le Malo.

**FOFOGA FETALAI:** Ua ou manatu ae le i faagasoloa le tulaga o galuega a le Fono Aoa, e tataua lava ona ou faasilasila atu mo le silafia e le paia o le Palemene ma le Kapeneta foi aemaise o Ofisa Sili o Pulega o Matagaluega ma Faalapotopotoga, aemaise o le faafofoga tapuai mai foi a le atunuu. Mo le silafia ua tatou auai faatasi nei ma le Susuga i le Loia Sili fou, le Susuga ia Savalenoa Mareva Betham i le fonotaga a le Palemene i le aso e tusa ai ma lona valaauina i galuega masani.

Avea lenei avanoa ou te faatalofa atu ai i lau afioga i le Loia Sili, o le valaauina e pei lava o la le Tusi, o lo tatou valaauga o le finagalo lea o le Atua. Ia alo maia ia manuia lou alofaiva aua le tautuaina o si o tatou Malo e ala i le Ofisa o le Loia Sili, aemaise o lau afioga o le tofi o le Loia Sili a le Malo. Ia faamanuia le Atua i lou tulai mai.

## **TUUINA ATU O PEPA**

*Na tolaulauina e le Failautusi i le Fono Aoao le faasologa o Pepa e tusa ai ma T.T.49(2).*

1. P.P.2020/2021 Nu.27, Lipoti Faaletausaga Pulega Tagata Tafafao Maimoa tausaga faaletupe Iulai 2018 – Iuni 2019.
2. P.P.2020/2021 Nu.28, Lipoti Faaletausaga a le Ofisa o le Loia Sili tausaga faaletupe Iulai 2018 – Iuni 2019.
3. P.P.2020/2021 Nu.29, Lipoti Faaletausaga a le Faalapotopotoga o Esetete Tausi o Samoa tausaga faaletupe 2018 ma le 2019.
4. P.P.2020/2021 Nu.30, Lipoti Faaletausaga a le Faalapotopotoga o Tau mo Faalavelave Faafuasei tausaga faaletupe 2019.
5. P.P.2020/2021 Nu.52, Lipoti Faaletausaga a le Matagaluega o Faamasinoga ma le Faafoeina o Tulaga tau Faamasinoga tausaga faaletupe 2018/2019.

## **TUUINA ATU O LIPOTI A KOMITI FAA-PALEMENE**

*Na tolaulauina e le Failautusi le faasologa o Lipoti a Komiti Faa-Palemene e tusa ai ma T.T.52(5).*

1. P.P.2020/2021 Nu.38, Lipoti a le Komiti o Tulafono Tumau, Mataupu tau Faiga Palota, Talosaga ma Tofiga faale-Faavae i le Tulafono Tau Faaofi e Soloia ai ni Tulafono mai le Upega o Tulafono 2019.
2. P.P.2020/2021 Nu.39, Lipoti a le Komiti o Tupe Maua ma Tupe Totogi i le Tulafono Tau Faaofi o le Pulega o Malosiaga 2020.
3. P.P.2020/2021 Nu.40, Lipoti a le Komiti o Tupe Maua ma Tupe Totogi i le P.P.2019/2020 Nu.202, Lipoti Faaletausaga a le Pulega o Tupe Faava o Malo a Samoa tausaga faaletupe 2018/2019.
4. P.P.2020/2021 Nu.41, Lipoti a le Komiti o Tupe Maua ma Tupe Totogi i le P.P.2019/2020 Nu.203, Lipoti Faaletausaga a le Pulega o Faailoga ma Tusi Pasi Taualoa a Samoa tausaga faaletupe 2018/2019.
5. P.P.2020/2021 Nu.42, Lipoti a le Komiti o Tupe Maua ma Tupe Totogi i le P.P.2019/2020 Nu.205, Lipoti Faaletausaga a le Ofisa o le Pule Faatonu tausaga faaletupe 2018/2019.
6. P.P.2020/2021 Nu.43, Lipoti a le Komiti o Tupe Maua ma Tupe Totogi i le P.P.2019/2020 Nu.209, Lipoti Faaletausaga a le Matagaluega o Tupe tausaga faaletupe 2018/2019.
7. P.P.2020/2021 Nu.44, Lipoti a le Komiti o Tupe Maua ma Tupe Totogi i le P.P.2019/2020 Nu.214, Lipoti Faaletausaga a le Faalapotopotoga o Suesuega Faa-Saienisi a Samoa tausaga faaletupe 2018/2019.

8. P.P.2020/2021 Nu.45, Lipoti a le Komiti o le Vaega tau le Tamaoaiga i le S.R.2020/1, Tulafono Faatonutonu o Laisene o Pisinisi 2012, ma le S.R.2020/2, Tulafono Faatonutonu o Teuteuga o Tulafono Faatonutonu o Laisene o Pisinisi 2018.
9. P.P.2020/2021 Nu.47, Lipoti a le Komiti o le Vaega tau le Tamaoaiga i le P.P.2020/2021 Nu.10, Lipoti Faaletausaga a le Matagaluega o Faatoaga ma Faiga Faiva tausaga faaletupe 2018/2019.
10. P.P.2020/2021 Nu.48, Lipoti a le Komiti o le Vaega tau Atinae Eeseese i le P.P.2019/2020 Nu.140, Lipoti Faaletausaga a le Pulega o Malae Vaalele tausaga faaletupe 2018/2019.
11. P.P.2020/2021 Nu.49, Lipoti a le Komiti o le Vaega o Atinae Eeseese i le P.P.2019/2020 Nu.150, Lipoti Faaletausaga a le Kamupani o Auaunaga o Vaa a Samoa mo le tausaga faaletupe 2018/2019.
12. P.P.2020/2021 Nu.50, Lipoti a le Komiti o le Vaega tau Atinae Eeseese i le P.P.2019/2020 Nu.164, Lipoti Faaletausaga a le Matagaluega o Punaoa Faalenatura ma le Siosiomaga tausaga faaletupe 2018/2019.
13. P.P.2020/2021 Nu.51, Lipoti a le Komiti o le Vaega o Atinae Eeseese i le P.P.2019/2020 Nu.201, Lipoti Faaletausaga a le Faalapotopotoga o Vaa a Samoa tausaga faaletupe 2018/2019.

## **LAFO A KOMITI FAA-PALEMENE**

**FOFOGA FETALAI:** Ou te tapa le Taitaifono o le Komiti Faapitoa.

**Afioga Hon GATOLOAIFAANA AMATAGA ALESANA GIDLOW (Taitaifono Komiti Faapitoa):** E faatalofa atu i lau Afioga i le Fofoga Fetalai, afio foi lau Afioga i le Taitai o le Maota le Taitai o le tatou Malo, afifio foi le mamalu o le Kapeneta ae tainane foi le afifio o Minisita Lagolago ma le mamalu o le tatou Palemene. E faapea foi Ofisa Sili o Pulega o Matagaluega ma Faalapotopotoga Tumaoti a le tatou Malo.

E faatalofa faapitoa atu i le afio ai o le tatou Loia Sili. Lau Afioga i le Tamaitai Loia Sili, ia faamanuia atu le Atua i ou faiva o faafeagai ai ma tofiga ua i ai.

Lau Afioga i le Fofoga Fetalai ua ou tulai atu e faatu le lafo, *Ina ia aumai se faatagaga a le Fono Aoao e faaauau ai Sailiiliga a le Komiti Faapitoa i Tulafono Tau Faaofi e 3 o lo o feagai nei ma le Komiti ona e le i maea atoatoa suesuega ma sailiiliga o lo o faia nei. O Tulafono e 3 e aofia ai:*

1. *Tulafono Tau Faaofi o Teuteuga o le Faavae 2020.*
2. *Tulafono Tau Faaofi o le Faamasinoga o Soligatulafono 2020.*
3. *Tulafono Tau Faaofi o Fanua ma Suafa 2020.*

Ma le faaaloalo lava.

*Faaluaina e le sui usufono mo Aleipata Itupa i Lalo ma le sui usufono mo Falealili Sasae.*

*Na faamaonia le lafo.*

### **TULAFONO TAU FAAOFI O TEUTEUGA O LE TULAFONO O LE FAASOLOGA O TIUTE 2020 – faitauga muamua**

**FOFOGA FETALAI:** Ou te tapa lau Afioga i le Minisita mo Tupe Maua lau Afioga Tialavea.

**Afioga Hon TIALAVEA FEA LENIU TIONISIO HUNT (Minisita mo Tupe Maua):** Faafetai i lau Afioga i le Fofoga Fetalai. Ou te faatalofa atu foi i le mamalu o le Maota nei, aemaise foi o le afioga i le Loia Sili ua o tatou faatasi ma le mamalu o Ofisa Sili o Pulega o Matagaluega taitasi.

Lau Afioga i le Fofoga Fetalai ou te faatu le lafo, *Ina ia faitauina nei le Tulafono Tau Faaofi o Teuteuga o le Tulafono o le Faasologa o Tiute 2020 i lona faitauga muamua.*

*Faaluaina e le Minisita o Tupe.*

*Na faamaonia le lafo ma faitauina le Tulafono Tau Faaofi o Teuteuga o le Tulafono o le Faasologa o Tiute 2020 i lona faitauga muamua.*

### **TULAFONO TAU FAAOFI O LE ULUFALE MAI O TAGATA 2020 – faitauga muamua**

**FOFOGA FETALAI:** Ou te tapa ma le faaaloalo lau Afioga i le Taitai o le Maota.

**Susuga Hon TUILAEPA AUELUA FATIALOFA LUPESOLIAI LOLOFIETELE NEIOTI AIONO GALUMALEMANA Dr. SAILELE MALIELEGAOI (Palemia):** Lau Afioga i le Fofoga Fetalai, ae ou te le i faatu atu le lafo, avea ia lenei avanoa ou te faatalofa atu ai i lau Afioga faapea foi le mamalu o le tatou Maota nei, faapea le faafogafoga mai a Lana Afioga Mamalu O Le Ao o le Malo ma le Sui Tofia, tainane foi le mamalu o Samoa i ona tulaga faalupe.

Ou te faatauaina lau saunoaga lau Afioga e tulai mai le Taitai o le Maota. O lea foi na tomua le tatou Fono i le saunoaga, Faaaliga mai le Taitai o le Maota, o Au lea. Ua ala ona ou faatau lau saunoaga, ona e i ai sui usufono

toaitiiti o le Maota lenei e le o manatunatu i le uiga loloto o le upu, Taitai o le Maota, a o le Minisita foi o le Maota.

Lau Afioga i le Fofoga Fetalai, e i ai foi ma se tasi sa avea ma Fofoga Fetalai, avea ma Minisita o le Malo, e 10 tausaga o i totonu o le Maota lenei ae le malamalama i le uiga o le upu, Taitai o le Maota. O le taua lena o lau saunoaga i le taeao lenei i lou tulaga faa-Taitai o le Maota, lea e mafua ai ona ou tutū atu i i ma le Kapeneta leaga o lea ua o tatou fonofono, o tatou o sui usufono o le Fono Aoa o le Palemene o le Malo o Samoa. Tatou te le o fonofono o le Malo, o le Kapeneta, o lea tatou te fonofono o sui usufono o le Palemene o Samoa, o sui o nofoa o itumalo faa-palota o le tatou atunuu. Ua ou taua lea mea, ona e i ai ni manatu e le tataua ona ou saofai i i ma faaoga po o le faatino o ou tiute o au o le Taitai o le Maota e afua i se malamalama le faavaea, le atoatoa i le separation of powers, po o le tuueseeseina o le tulaga o le tutoatasi o itutino e 3 o le tafatolu. O le tafatolu lea e tatou te talanoa ai, o le tafatolu o pulega faa-Malo o le Taupulega, e ese ai ma le tuueseeseina o power o isi foi faigamalo faa-Peresetene. O le a le eseese? E fused, e i ai fesootaiga, o fesootaiga o itutino taitasi o le 3 itutino o le tafatolu. O faiga na faa-Taupulega. O le a le uiga o le upu e i ai fesootaiga? E le mafai ona galue i le atoatoa so o se itutino, leaga e 1 le itutino lea e i ai malolosi tele lava e 2 lau Afioga i le Fofoga Fetalai. O le a malolosi ia e 2? O le tupe faatoa mafai ai ona faagaioi galuega a isi itutino. Ma le 2, o lea e i i i le itutino lea o le Malo le malosi e mafai ai ona puipui le saogalemu o le atunuu lenei, le saogalemu mai ia i latou o solia Tulafono e faatino e le Maota lenei.

Lau Afioga i le Fofoga Fetalai, ia manino lelei le tulaga lea. E ui ina eseese itutino o le tafatolu, ae feuluuluai, e fesootai, e le mafai ona tutoatasi i le atoatoa isi itutino pe a le galulue faatasi ma le itutino lea ou te tutulai atu ai i le itu lenei. E le o ni a tatou auala po o se tatou malamalama na faatino ai mea ia, na faatino i aga masani faale-Tulafono ma aga masani e faatino ai faigamalo faa-Temokarasi i lalo o faiga faavae a faigamalo faa-Palemene.

Lau Afioga i le Fofoga Fetalai, e taua tele le mea lea ua ou toe tulai atu ai. Ona e i ai sui usufono e toaitiiti o le Maota lenei, e fiafia tele i le mea lea o le faalele a o upu a le atunuu, “e mau e faalele mau e matau.”

Lau Afioga i le Fofoga Fetalai, ou te faatu le lafo, *Ina ia faitauina nei le Tulafono Tau Faaofi o le ulufale mai o tagata 2020, i lona faitauga muamua.*

*Faaluaina e le Minisita o Pisinisi, Alamanuia ma Leipa ma le Minisita mo Tina ma Tamaitai, Atinae o Nuu ma Afioga ma Agafesootai.*

*Na faamaonia le lafo ma faitauina le Tulafono Tau Faaofi o le Ulufale mai o Tagata 2020 i lona faitauga faalua.*



**TULAFONO TAU FAAOFI O TEUTEUGA ESEESE (AIAIGA O  
TOTOGI INA UA FAAMALOLO LE TUMAU MAI LE GALUEGA)  
2020 – faitauga faalua**

**Susuga Hon TUILAEP AUELUA FATIALOFA LUPESOLIAI LOLOFIETELE NEIOTI AIONO GALUMALEMANA Dr. SAILELE MALIELEGAOI:** Lau Afioga i le Fofoga Fetalai, ou te tulai atu ma le ava tele, *Ina ia faitauina nei le Tulafono Tau Faaofi o Teuteuga Eseese (Aiaiga o Totogi ina ua faamalolo le tumau mai le Galuega) 2020, i lona faitauga faalua, ma ou te fia tautala i ai.*

*Faaluaaina e le Minisita o Tina ma Tamaitai, Atinae o Nuu ma Afioga ma Agafesootai ma le Minisita mo Pisinisi, Alamanuia ma Leipa.*

**FOFOGA FETALAI:** Ou te tapa lau Afioga i le Palemia mo lau saunoaga faamalamalama.

**Susuga Hon TUILAEP AUELUA FATIALOFA LUPESOLIAI LOLOFIETELE NEIOTI AIONO GALUMALEMANA Dr. SAILELE MALIELEGAOI:** Lau Afioga i le Fofoga Fetalai, o le sini autu o le Tulafono Tau Faaofi o le faamalamalamaina lea e faapea. O tagata faigaluega uma o tagata ia ua faamalolo le tumau a le Malo. E agavaa latou te mauaina le totogi, ua na o le vaitaimi e 1 le masina, pe afai ua faamalolo le tumau mai le galuega. Afai o le faamaloloina le tumau ua sili atu na i lo le 1 masina, e afua mai le taualumaga o suesuega o lo o faaauau pea. O le a taofia loa le totogi o le tagata faigaluega ua faamalolo le tumau. Afai o le maea ai o taualumaga o suesuega o le tagata faigaluega ua faamalolo le tumau, e mama lava lona igoa i tuuaiga uma e afua ai ona faamalolo le tumau. E tatau ona totogi atu i le tagata faigaluega ua faamalolo le tumau le totogi sa ia le mauaina. E amata mai i le aso na taofia ai lona totogi seia oo i le aso na toe faafaigaluegaina ai o ia. Peitai, afai o le tagata faigaluega ua faamalolo le tumau, ua le ta'umamaina lona igoa i tuuaiga. Ma o le faaiuga na afua mai i taualumaga o suesuega a o faagasolo lona faamaloloina le tumau ai. Mo lona tagata ina ia faamuta loa lona tofiga ma leai se isi gaoioiga e tatau ona faia i le totogi, o le tagata ua faamutaina lona tofiga.

Lau Afioga i le Fofoga Fetalai, ua le 1 pe 2 ona tutupu mai ia faafitauli nei, na tupu ae ai se manatu i le Malo, ua tatau ona toe teuteu ana faiga faavae ua leva ona sosolo mai ai. O le itu ou te fia faatepa i ai le Maota, ona ua ese aso ma taimi sa pasia ai Tulafono nei ma le vaitau lenei ua tatou i ai. O lona uiga o le faaupuga, sa le toatele ni tagata faigaluega, sa le tele foi ni faamasinoga e tulai mai. Sa faigofie foi ona faasolo lelei ia faasologa o faamasinoga. O le mea ua tulai mai i le taimi lenei i le anoano o solitulafono. Ua umi o faatali, e i ai le isi tagata faigaluega na faamalolo le tumau mo le 2 tausaga a o taligā ia faamasinoga. Aemaise o faamasinoga ua faia i le uluai

faamasinoga, ae toe apili. Ona toe faatali lea i le isi umi, aua a faatali mo le apili e faamoemoe i le avanoa o faamasino mai fafo. I le taimi lena ua sui nei a tatou faiga faavae, ua mafai loa ona faalagolago tatou ia tatou lava apili. O lea ua i ai faamasino Samoa e mafai ona latou faia nai lo le faalagolago pea i faamasino mai fafo. Seiloga lava la e avanoa uma faamasino e o mai mai fafo, ona faatoa mafai loa lea ona valaau le faamasinoga apili. O lona uiga la, faamasinoga muamua o le uluai suesuega, toe fai le faamasinoga apili, e ono faitau tausaga. O la lava e totogi pea le tagata faigaluega, na o le ala ae i le fale moe, fealualuai i le taavale a le Malo ma alu ai penisini. Ae a faapea e maua ane e matua faamaonia lava lana solitulafono, o lona uiga afai o le 2 tausaga lea na faatali ai le faamasinoga. O le 2 tausaga foi lena o le maumau o tupe a le Malo, ia ma maumau penisini e totogi fua ai lenei tagata. Ae o lea na iloa lava na solitulafono mai le amataga, a o tatou o lo o alu i le faiga faavae e le mafai ona ta'u solitulafonoina se isi, seiloga ua fai le faamasinoga. E mafai lava ona iloa le tagata ma lana solitulafono, ae faatali lava ona o uiga ia faatemokarasi, e tatau lava ona fofoga se faamasinoga e aumai aloaia, pe mama pe le mama.

Lau Afioga i le Fofoga Fetalai, o se faiga e tatau ona fai mo le faasaoina o seleni a le atunuu. Ma o lea foi o lo o manino, afai lava o le tulaga ua faamalolo ai, e alu alu alu ua le faamalieina le faamasinoga, po o tulaga foi o le Tulafono e tatau ai ona faatino se faaiuga. Ona toe foi loa lea o le tagata ia e alu e faigaluega.

I le faiga la lea ua i ai, o lea e avatu e le Tulafono, e na o le 1 lava le masina, 1 lava le masina. Ona tuusaunoa loa lea ma le faamoemoe o le a le taimi e faatino ai. Afai e sau le faamasinoga o la e mama, e toe maua uma lona totogi. E toe maua uma lava, o lona uiga e leai se mea e popole ai i le faatinoina o le amiotonu.

Lau Afioga i le Fofoga Fetalai, ma le faamoemoe o lea ua manino lelei, ia le faamalamalamaga o le mafuaaga o le faasaoina o tupe a lo tatou Malo, mai le ono alu faamaumau i se faaiuga ua faia. O lea foi e i ai isi itutino a lo tatou Malo o lea o lo o i ai e mafai ai ona faia isi iuga. E pei o le Komesina o Sulufaiga e sulufai i ai tagata uma, i se faaiuga ua le talafeagai. Lau Afioga i le Fofoga Fetalai, o le faamalamalamaga lena o lenei tamai Tulafono.

**FOFOGA FETALAI:** Malo saunoa o lea ua manino auofala i le saunoaga a le Palemia. Tulai mai le sui usufono mo Salega Sasae.

**Tofa OLO FITI AFOA VAAI (Salega Sasae):** Faafetai i lau Afioga mo le avanoa. Talitonu foi e piiama foi lenei itumalo i le taulaga faafetai na e siitia i lenei taeao. I le taitai mai o lou soifua ma so matou ola aua le faaauauina o le tatou galuega.

Lau Afioga i le Fofoga Fetalai, ua ou tulai ma le ava ma le faaaloalo e tatau ai, e fia fai foi o se manatu i le Tulafono lenei. A o le i avatua ni nai motugaafa lau Afioga, e ao lava ona avatu sau faamatalaga ona ua saunoa

manino le Afioga i le Palemia, i le tulaga o se sui na ia fesiligia le Taitai o le Maota. Lau Afioga o au lenei ma le ava. Na ala ona ou fesiligia lau afioga...

**FOFOGA FETALAI:** Malie le sui usufono...se i tulai mai le Palemia.

**Susuga Hon Tuilaepa Auelua Fatialofa Lupesoliai Lolofietele Neioti Aiono Galumalemana Dr. Sailele Malielegaoui:** E ese le mea lea e saunoa i ai le sui usufono. O lea tatou te talanoaina le mataupu tau Immigration. Na ona ou tulai atu e faasao le mea lea e tulai mai ai le sui usufono.

**FOFOGA FETALAI:** E i ai le manatu e faatoa talanoa se mataupu pe a faapea e faataatia e le Palemene, se saunoaga faaminisita. A o le saunoaga a le Taitai o le Malo ia, ua na o se faapupulaga o vailiu ia, ina ia manino i ai, e le gata i le Maota ae faapea foi le faafofoga tapuai mai o Samoa. O le mea lea, e i ai le manatu o le Nofoa, e leaga e le tatau ona oo i ai le saunoaga ae agai sao i le mataupu lea e uiga i le Tulafono lea ua talanoaina nei, mo le totogi o lo o faapena ona saunoa nei i ai le Palemia e faamalamalama.

E tapa le sui usufono ina ia faapena ona faagasolo le tatou galuega.

**Tofa OLO FITI AFOA VAAI:** Ua ala foi ona ou talanoa atu, ona o le Tulafono Tumau o lea e manino. O le Taitai o le Maota, o le Taitai o le Vaega Faaupufai o lo o pulea le Malo...

**Susuga Hon Tuilaepa Auelua Fatialofa Lupesoliai Lolofietele Neioti Aiono Galumalemana Dr. Sailele Malielegaoui:** Lau Afioga i le Fofoga Fetalai, ua fai soo lava le mea a le sui usufono lea, a o lea ua uma ona fai lau faaiuga.

**FOFOGA FETALAI:** Malie le sui usufono, ne i matau mai e le atunuu e faapea o faitauina ai se faaiuga a le Nofoa. Ae ona o le tulaga o le tausia o tatou Tulafono Tumau. Ua e malele lava ma saunoa lau Afioga ma e tau mai o oe le sui o lo o faapena ona e le manino ma ese foi lau faitauga i le tulaga o le Taitai o le Maota ma lona faatulagaga. Ae malie le sui usufono, o le mea lena o le mea tau le lotoifale o le Palemene. E tasi lava le tagata e faauigaina na o le Fofoga Fetalai ma le Nofoa. O le mea lea ou te faamalulu atu ai, o lou lava lea finagalo. E le faapea la o le a taitai atu ai le finagalo o le Palemene ma le finagalo o Samoa i lou finagalo toatasi. Ae o lea ua ou fai atu, malie le sui usufono aua tatou te sailiili masei. E pei lava ona ou fai atu, se o le Nofoa e tumu i le faaaloalo. Manatu i le tapuaiga a le atunuu. Ae alu tonu i le tulaga o le mataupu lea, i le Tulafono lea e pei ona faamalamalama e le Palemia. Tulai mai le sui usufono.

**Tofa OLO FITI AFOA VAAI:** Faafetai, faamalulu atu foi, ona e le logolelei, ae o le a ou alu i le Tulafono. Lau Afioga i le Fofoga Fetalai, a matau lau Afioga i le mataupu lenei masalo po o le faa-lua, faa-tolu o ou tautala i ai i le mataupu lenei. Manatua le 2017 sa ou laga ai le mataupu lenei a o tatou fono i Tuanaimato, i le tulaga lava lea sa faufautua atu ai. O lea ua saunoa manino le Palemia i le tele o tupe le aoga ua faaalu le aoga ona o le le sao ona fai le Tulafono lenei.

**Susuga Hon Tuilaepa Auelua Fatialofa Lupesoliai Lolofietele Neioti Aiono Galumalemana Dr. Sailele Malielegaoui:** Ou te le i manatua na saunoa i ai le sui usufono lea i le mataupu lea. A faapea e manao e aumai ni faamaoniga, ona aumai lea o ni faamaoniga o au saunoaga. I lalo o au faamaumauga, e te le i saunoa i ai i le Fono lea e te taua.

**FOFOGA FETALAI:** Se i tulai mai le sui usufono.

**Tofa OLO FITI AFOA VAAI:** O lea e faamaumau e le Fono Aoaofaitulafono. Ou te le i faamaumaua.

**Susuga Hon Tuilaepa Auelua Fatialofa Lupesoliai Lolofietele Neioti Aiono Galumalemana Dr. Sailele Malielegaoui:** Malie lau Afioga i le Fofoga Fetalai, o lea o le a ou toe tulai atu.

**FOFOGA FETALAI:** O lea o le a ou fai atu. Malie le sui usufono, tatou te see mai i Tuanaimato, e le i talanoaina le mataupu lea. E faigofie lava, o lea la ua ou fai atu o lea faatoa talanoa le mataupu lea. Ae malie le sui usufono, e tulai mai e agai tonu i le mataupu lea.

**Tofa OLO FITI AFOA VAAI:** Lau Afioga i le Fofoga Fetalai, se i tau onosai mai o lea e tau avatu ni nai motugaafa. Ae sao e puupuu lava ma manino le Tulafono, e pau lava le manatu o Salega Sasae. Ia faasaosao loa mea sa sese ona fai. I le mea o le alu atu lava o le CEO e le...maumau atu ai ma tupe a le Malo. O le isi vaega lau Afioga i le Fofoga Fetalai...

**Susuga Hon Tuilaepa Auelua Fatialofa Lupesoliai Lolofietele Neioti Aiono Galumalemana Dr. Sailele Malielegaoui:** Lau Afioga i le Fofoga Fetalai, se i ou tulai atu lava e faasao le sui lea...

**FOFOGA FETALAI:** Se i tulai mai le faasaoga e le Taitai o le Maota.

**Susuga Hon Tuilaepa Auelua Fatialofa Lupesoliai Lolofietele Neioti Aiono Galumalemana Dr. Sailele Malielegaoui:** Se o togafiti lava nei ua leva ona e faia, e fai atu loa lea mea, o au lava lenei na ou tulai atu e fautua atu. Fai atu lea fuafuaga a le Malo, o au lava lenei na tulai mai e lauga ai.

Fai atu lea mea, o au lava lenei na, a e toe saunoa i le mea lea, ona aumai lea o au faamaumauga, aua o lalo o au faamaumauga e te le i saunoa ai lava i se mea faapea. Lau Afioga i le Fofoga Fetalai, o lea foi e maua au faamaumauga.

**FOFOGA FETALAI:** E faapena le uiga o le soifuaga. Fai mai upu a toeaaina, e pepelo e le tamaititi le toeaaina, e na o le soiso'i lava o le toeaaina foi lea ma mafaufau. E le toe fia pepelo leaga o le mea na sau ai. Ae ui i lea, foi mai se lagona.

**Tofa OLO FITI AFOA VAAI:** Lau Afioga i le Fofoga Fetalai, o oe na e te faamaumaua, o lau Afioga o lo o faamaumaua mea ia. Ae a faapea e te le o silafia foi faamaumauaga, o le a le afaina lea.

**FOFOGA FETALAI:** O Iuni, o le fono lea, ua 2 nei masina talu ai.

**Tofa OLO FITI AFOA VAAI:** Na pau la mea ia lau Afioga i le Fofoga Fetalai, e i ai foi nai isi vaega ia, aua o lea e le manino lelei mai. O mea uma lava mo aseta a le Malo lea e faaoga foi i galuega a CEO. O lea ua taua le taavale, a o mea o telefoni ma mea faapena. E ao foi ona taofiofi uma i tulaga ia. Ae faafetai, ua faia e le Palemia mea sa ou fautuaina ai. Ma le faaaloalo faafetai.

**FOFOGA FETALAI:** O lona uiga i le aotelega i le saunoaga a le sui usufono mo Salega Sasae, e lagolago i le Tulafono lau Afioga. Malo faafetai, e taualoalo lava ae o le mea e tasi, faafetai.

Tulai mai le sui usufono mo Nuu Tu Taulaga Sisifo.

**Afioga FAUMUINA ASI PAULI WAYNE FONG (Nuu Tu Taulaga Sisifo):** E momoli atu le faafetai i lenei taeao, i lau Afioga. E fiafia foi le agaga e tilotilo atu, o maua pea e lau Afioga le malosi o le tino faapea foi le mafaufau. Ia faapena foi le Afioga i le Palemia ma lena itu.

E na ona ou tulai atu e faaleo se agaga lagolago i le Tulafono ua aumai nei. Faafetai tele lava mo le manatu e aumai se Tulafono faapenei, ua leva ona tatou nonofo foi ma autilo i tulaga ia. Ae 2 lava nai vaega e fia avatu ai se tuualalo i lau Afioga i le Fofoga Fetalai, atonu foi e aoga i tulaga o le Tulafono lenei. Ona e i ai nisi o Ofisa Sili o Pulega o Matagaluega, ua le o toe tulai mai ona o tulaga i suesuega foi na faia. Ae i ai foi latou na ave i le faamasinoga ma oo ai lava i le Tulafono, ma faamaonia ai e le solitulafono i latou. Ae peitai ua faamaloloina i latou mai galuega sa auauna ai. O le agaga lava ia pe le toe tagai le Malo a faapea e i ai se tulaga faapea ua tulai mai. Ona toe aumai lea o i latou ia sa i ai le masalosologa o lo o i ai a latou contract o lo o faigaluega ai.

O le isi tuualalo lau Afioga e puupuu lava, e ao foi ona tilotilo.....

**Susuga Hon Tuilaepa Auelua Fatialofa Lupesoliai Lolofietele Neioti Aiono Galumalemana Dr. Sailele Malielegaoui:** Lau Afioga i le Fofoga Fetalai, se i ou vave tali atu lava i le tuualalo lea. E i ai processes a le Malo e faatino ai a latou faaiuga, aemaise foi nisi o Tulafono tai pei foi o le Tulafono a Leoleo, o la foi e i ai a latou powers e faatino ai tulaga faapena. Ae seivagana o le vaega lea e pau tonu, e faatino ai le Tulafono lea, ona faapena lea ona fai. Ae pau lau tuualalo i le sui usufono, e tau fai ma tau va va ma le sui usufono lea faatoa uma atu nei. Leaga o le isi lona vaaiga e aafia i lalo o Vaega faa-upufai ua faatu, ae le o formal, e le o taualoa. Tulaga na a e tutu soo i luga ma o faatasi lava lua manatu ma Olo, e ese ai ma lua talanoaga fai faatasi e fai mai i le leitio. E ese ai ma lua ata e tuu agai i luga, o le agaga lava lona o le mea lea o le faiga vaega e tusa ai ma le tatou Tulafono. O lea la ou te faatalitali i se finagalo o le Fofoga Fetalai, aua ua leva ona tataua ona lua o e tauave le tou vaega faa-upufai, ae o lea e te lua lafilafi solo, e te lua fefefe e fai le mea lona.

**Afioga FAUMUINA ASI PAULI WAYNE FONG:** Lau Afioga i le Fofoga Fetalai, e le o lavea i le Tulafono lea e talanoaina, le mea la e talanoa mai ai le Afioga i le Palemia.

**Susuga Hon Tuilaepa Auelua Fatialofa Lupesoliai Lolofietele Neioti Aiono Galumalemana Dr. Sailele Malielegaoui:** Aua ne i e vave tele, ae tu va va.

**Afioga FAUMUINA ASI PAULI WAYNE FONG:** O lona ia lava lea manatu, ae le o le Tulafono lona o lea tatou te talanoaina. Ae faamalulu atu i le Afioga i le Palemia, e leai. O lea ua ou tutoatasi, e tele lava, e pule lava au ia i le mea ou te alu agai i ai. Ua ou le toe i lalo i se vaavaaiga a lau Afioga i le Fofoga Fetalai, aemaise taitai o le tatou Vaega. A o au, ou te alofa ia i le toeaina. Maumau e pe ana tutusa lou alofa ma le alofa mai. A o le faalavelave e le lavea au i le lisi o tagata e alofa i ai. A o le mea taua lau Afioga i le Palemia, aemaise lau Afioga i le Fofoga Fetalai, o lau tuualalo lona lua...

**FOFOGA FETALAI:** Se i toe tulai mai le faasaoga a le Palemia.

**Susuga Hon Tuilaepa Auelua Fatialofa Lupesoliai Lolofietele Neioti Aiono Galumalemana Dr. Sailele Malielegaoui:** O le uiga o lau faamatalaga, tau faavava foi lea, uma loa Olo sosoo ma oe, uma Olo soso ma oe. O lona uiga, o se fesoasoani lea ou te tuualalo atu ai. O le mea o le alofa e faatino i galuega, o le isi galuega tele lona o lea ou te faia, o le avatu o lau fautuaga aua le tutu sosoo. Manatua foi le tatou \$20miliona lea sa faasao atu e le Minisita o Tupe, ae o la lava e te lua o, o fea le \$20 miliona? . Ae ua uma ona faamatala atu, o le \$20miliona o atinae o Faatoaga i lalo o

faaupuga lautele, World Bank, o le IDA lava lena. A o le mea na ou matauina i le aso lea, na ona uma lava ona tu ae le isi sui usufono, tu mai Olo, tu mai oe, ua sosoo tele, aemaise o lea tou te tutu mai lava i le mea e tasi. O le mea la lea, o lau tuualalo i le alofa, tutu va va.

**Tofa Olo Fiti Afoa Vaai:** Lau Afioga, ona o lea ua taua lou igoa.

**FOFOGA FETALAI:** E pei o le saunoaga a le Palemia, o la e fai i le sui usufono le la.

**Tofa Olo Fiti Afoa Vaai:** O le 10 tausaga talu ai, e le i popole faapea le Afioga i le Palemia, ae ua ou vaai atu lava, ua matuai popole. Se aua e te popole, e leai lava se mea o le a e popole ai fua i le Faiga Palota. A ua aumai lava le tali a le Atua ua uma oe, ua uma foi oe.

**Susuga Hon Tuilaepa Auelua Fatialofa Lupesoliai Lolofietele Neioti Aiono Galumalemana Dr. Sailele Malielegaoui:** Lau Afioga i le Fofoga Fetalai, ou te le o popole, ae o le mea lea ou te tulai atu ai. O le mea o le tagata foi ia e lafilafi solo palaaai. O la ua alu tasi lava sia tama, ae o latou uma e toa-tolu. O le a le mea ua faapea ai, matua lua le alolofa tele i si tama.

**Tofa Olo Fiti Afoa Vaai:** O le mea lena e tau o le political strategy. O lena foi e te masani ai.

**FOFOGA FETALAI:** E i ai foi itu lelei o le fautuaga. Mo le silafia e sui usufono, e i ai foi le itu lelei i le fautuaga a le Taitai o le Maota. Se i tau va va le tu mai o le isi tu mai o le isi. Pe tu atu le isi e ese le mea la e tu ai le vae, ae o le a toe tu atu ai foi ma le isi. Ona tau fai faaletonu uma ai lea o vae, ae faapena e fetuutuunai.

Tulai mai le sui usufono mo Nuu Tu Taulaga Sisifo.

**Afioga FAUMUINA ASI PAULI WAYNE FONG:** Faafetai i le Palemia, aemaise foi o si au uo lea o Olo. E leai lau Afioga i le Palemia, o lea ua ou tilotilo atu ailoga i ai se isi e lauga. O lea ua ou tulai atu ai ne i te i ua oo i le taimi e faamuta mai ai le avanoa, ona aumai lea o le fesili ae ua le maua se avanoa.

O le tuualalo lona lua lau Afioga le Fofoga Fetalai, i le vaitaimi sa fai ai interviews e le PSC, ona fai lava lea e latou o le recommendation e ave e filifili ai ia Ofisa Sili o Pulega o Matagaluega ma Ofisa Sili Lagolago. E sea sea lava ona i ai ni tulaga faapea e tulai mai, i ni tagata ua fai i ai ni suesuega. Talu lava ona fai e le Kapeneta le filifili o Ofisa Sili o Pulega o Matagaluega, na o le faaletonu lava. Ona aisea? Ona ua aumai le recommendation pe ua aumai le fautuaga a le panel na faia le interview, ae le usitaia e le Kapeneta ma i latou. Ona piki mai lea o le tagata o lea e i lalo, aumai ulu i luga, o le

mea lena o lea e maua ai le mea lea. Ae o le mea e sili ona taua, o lea ua fai le Tulafono e puipuia ai, ia aua ne i toe tulai mai le tulaga lea. Pau lena o se fautuaga lau Afioga i le Fofoga Fetalai. Manuia fuafuaga o totoe i lenei aso.

**Susuga Hon Tuilaepa Auelua Fatialofa Lupesoliai Lolofietele Neioti Aiono Galumalemana Dr. Sailele Malielegaoi:** Lau Afioga i le Fofoga Fetalai, se i vaai e foliga mai, o la sa saofai ai i le fonu a le PSC. O fea na te aumaia ai nei mea? O fea na te aumaia ai ia mea? Lau Afioga i le Fofoga Fetalai, e sili ona ou faamalalama atu faapea. O mea nei o Komiti, latou te faia le faatalanoaga ona aumai lea o fautuaga e aumai i totonu o le Kapeneta. O le tele lava o taimi, e aumai le fautuaga, talia. Manatua foi, e toa-tolu i latou ia e faia faatalanoaga, ona aumai loa lea i totonu o le 13 lea. E manatua la, o lea e saofafai atu i totonu i i. O le toatele o le Kapeneta lenei, sa Ofisa Sili o Pulega o Faalapotopotoga, sa Ofisa Sili o Pulega o Matagaluega, Faauluuluga o Pisinisi, e matua malamalama lelei, i le natura o mea nei o le filifiliga o taitai o Matagaluega. E le gata i lea, a o si tamai atunuu lava lenei, toetiiti lava iloa uma e tagata mea uma e fai e isi tagata. O lea e tau tomanatu nei, masalo po o le 98% i le 99% o fautuaga e sau i lalo. E sau lava ma talia, ae se i vagana la se vaega toetititi, ua matua tele le iloa e le Kapeneta o faaletonu la e i ai, ona faatoa fai loa lea o le tofa a le Kapeneta. Manatua lea o le fautuaga, e faapena uiga o panels. Latou te faia le suesuega ona aumai lea o le fautuaga, ae fai e le Kapeneta le faaiuga. E te le o malamalama ai la i le mea lena. O le authority lea e i le Kapeneta, na te faia ai le faaiuga, a o le panel e sau ai le fautuaga, na o se fautuaga. O le saunoaga lea na e aumaia nei, e tupu ai mea faapena, i le piopio o faaiuga. Se i aumaia la se tasi, se i aumaia la se tasi, ona ou tau atu lea o le mafuaaga. O le mafuaaga, aua o le tele o le mea o faaletonu lea e talau mai, e goto ai lava i le Kapeneta. E goto ai lava i le Kapeneta e le mafai ona sau i fafo. O lea la o le a ou fesili atu ia te oe, ona o lau faamatalaga lea na aumai, ona o le le faia e le Kapeneta, ma usitai i le fautuaga. Se i vaai i lou le malamalama, le usitai o le Kapeneta i le fautuaga a lana Komiti, o le a aumai ai le mea lena.

Ma e oo lava i le taimi lenei, o la e feoai le Komiti, e fai le latou galuega, o le Komiti Taualoa na tofia atu iinei, o le Komiti e soalaupuleina le Tulafono. Ae o lea na tele.... o oe le isi, lea e o ma faasalalau ma faaleaga le galuega a le Komiti. O le a faapefea la ona e fai mai i le mea lea, a o oe lea e te saunoa faapena? O iinei i le Fonu Aoao, se i maea atu le mea lea ia e malamalama.

**Afioga FAUMUINA ASI PAULI WAYNE FONG:** Lau Afioga i le Fofoga Fetalai, o lea ou te talanoa i le Tulafono lea, o le Tulafono lea ou te talanoa atu ai, ou te le o talanoa i le Komiti.



**Susuga Hon Tuilaepa Auelua Fatialofa Lupesoliai Lolofietele Neioti Aiono Galumalemana Dr. Sailele Malielegaoi:** O le Fono Aoao Faitulafono e pasia ai mea uma.

**FOFOGA FETALAI:** Malie le sui usufono se i faamaea mai o lea foi e fia fai sau tala ae se i maea le saunoaga a le Palemia.

**Susuga Hon Tuilaepa Auelua Fatialofa Lupesoliai Lolofietele Neioti Aiono Galumalemana Dr. Sailele Malielegaoi:** O le Fono a le Palemene lea e i ai le pule, lea ua uma ona faatonu atu le Komiti e o e soalaupule i nuu uma Tulafono ia e 3. O lea foi faatoa uma nei ona tatou tuuina atu le faatagaga e faauma ai le latou galuega, fai maeaea. O lea e fai mai nisi ua leva ona tataua ona uma, ae o le mea lea e igoa o le fai maeaea atoatoa o le latou galuega, se i faatino le faatalanoaga. Aisea? Leaga o lea e o nisi ma fai ni tala le faavaea ua fai fua nei mea ae ua pasi le Tulafono. E faapefea ona pasi e le i pasia? E le i oo mai le Tulafono iinei. O lea la ua o le Komiti e faatino le latou galuega i le faatinoga i le tuutuu loloto o le latou tofa i le avatu aumai, a o lea ua faitio. E le mafai ona faia e le Komiti se faaiuga, seiloga e foi mai iinei ma le latou fautuaga. O lea foi la ua aumai le latou talosaga se i tuu avanoa atu leaga toeitiiti, e le i maea le latou faatalanoaga.

Lau Afioga i le Fofoga Fetalai, o le tulaga lena e tutusa lelei lava ma le mea lea, ae o lea ua e fai mai nei, sa tataua ona usitai le Kapeneta i le Komiti Faufautua e faapena foi ma iinei, e aumai le fautuaga a le Komiti o le Palemene i totonu o le Fono lenei ona soalaupule lea afai e talia talia, afai e leai, ua leai.

Lau Afioga i le Fofoga Fetalai o i ina e i ai le pule, o le Palemene, o le Komiti, o le Komiti galue a le Palemene e aumai lana fautuaga iinei mo le faaiuga faaiu, e faapena foi la le Kapeneta. A o lau upu lea na aumai nei, sa tataua ona usitai le Kapeneta i le Komiti, ua aliali ai i i lou le malamalama i ala o mea.

Lau Afioga i le Fofoga Fetalai, o le faamalamalamaga lena.

**FOFOGA FETALAI:** Malo faafetai. Ia pei sa ou...

**Afioga FAUMUINA ASI PAULI WAYNE FONG:** Lau Afioga i le Fofoga Fetalai, pe mafai la ona ou tali atu i le saunoaga a le Afioga i le Palemia.

**FOFOGA FETALAI:** Ia, e i ai itu ia e tau fai atu ai, aua o le tiute o le Nofoa o le tu i tamai ae lave i sela, ioe. Ia, o lea lava ou te tau matau faapea ai nei e faatu mai e le Palemia se lafo foi lea faapea e tapa faamaoniga o lau saunoaga, ia ona ou popole lea ne i te i foi ua uso ma lea foi sui usufono talu ai na mafua ai foi ona vevesi ma tulai mai foi le faamavae, ona e tapa loa faamaoniga, ona faigata loa lea ona aumai. E pei o le itu lena o lea sa ou

matau ai ma le popoe, a na faatu mai e le Palemia se lafo faapena, ou te talosaga i le Palemia e malie le tofa o felafoga lava i luga o le tulaga o sou foi finagalo e fia faaalua. Ia o a ea mea a outou saunoa ai? Ioe, e pei o le tulaga lena, a o lea foi ou te fautua soo atu lava, aua tatou te anu i le matagi leaga e toe foi mai. O le uiga o lea upu, o le a lava lau tuuaiga e ono afaina ai le Malo, e tulai mai lava le Malo e tali e faamalamalama. Aisea? Leaga o la e faafofoga Samoa. Ioe, o le tiute lena. O le mea la lea, se sa ta i ina foi taita. E pigi pigi lava ota manatu ota fai atu, ia lafo atu i le Malo e... e faapena. Ae a ta finau mauai loa i se mea ae tapa mai faamaoniga, ia o le afu lava o le faamavae, ioe. Aua o le mea lea e tupu... ia o lea ua outou faafofoga lea e saunoa le Palemia o lea e faatali se manatu o le Fofoga Fetalai ma sana faaiuga i le mea lea o Televisa ma mea ia o nusipepa ma mea ia. Ia ua ou manatu, e sao lava lau Afioga i le Palemia, ae ua ta musu ta te taetae otaota lau Afioga i le Palemia. E moni o lou tiute lea o le faamalamalama, aua e le o le tiute o le Fofoga Fetalai o le faamalamalama, o le tiute lea o lau Afioga i le Taitai o le Maota ma le Palemia. Ae, i faitauina foi faapea e le lelei lata tausiga o le Palemene, ioe. E afisi le isi ae faasavali le isi, ae alolofa ia outou sui usufono, se soia ia tou te o ma tou... ioe, soia ia tou te o ma outou... o le upu a le olomatua i lana tama, se o e tanea, ta mea lelei ae aua le faitatala ai i o i le vai. Ioe. O le matou tala lea. Tulai mai e faaauau le tatou galuega.

**Tofa Olo Fiti Afoa Vaai:** Lau Afioga i le Fofoga Fetalai, se toe faafoi au upu, au saunoaga. E ma te le faitatala.

**FOFOGA FETALAI:** Se ou te le o fai atu ia oe Olo.

**Tofa Olo Fiti Afoa Vaai:** E amata mai i ina saunoaga mamalu. E faapea ma te faitatala, e le o maua o ni fafine. Ma le faaaloalo.

**FOFOGA FETALAI:** Malie ia ta te le o taua lou suafa, o lea lava e faalauaitele lata tala. Ae ui i lea, tatou foi ia, masalo po ua maea le saunoaga a le Afioga i le sui usufono? Aua o lea ua ou manatu o lau fautuaga, o le a taoto mai i i o lea e faafofoga le Komiti, aua le iloa pe ave... o lea e faamoemoe e ave le Tulafono Tau Faaofi lea i le Komiti e iloilo ai ona toe foi mai lea i le Palemene. E aoga lou finagalo.

**Afioga FAUMUINA ASI PAULI WAYNE FONG:** Faafetai lava. O i ina la lea o le a agai i ai, ioe ae a faapea lava e maua se avanoa e oo atu ai e sutesue mataupu ia, ia e talitonu o le a faagata ai i i. E sao oe, sao o, ae sese uma matou. Faafetai lava mo le manatu.

**FOFOGA FETALAI:** Malo faafetai. E tasi lava le sao atoatoa, o la e faamalamalama e le Malo, a o le atoatoa lava e maua i le Komiti.

Ia se i tulai mai se tasi o sui usufono mo Falealili.

**Tofa AUMUA ISAIA LAMEKO (Falealili Sisifo):** Faafetai i lenei taeao i le Fonousu a Samoa, faafetai foi mo le lafo faatu a le Afioga i le Palemia e tusa ai ma lenei Tulafono Tau Faaofi. O le Tulafono lenei ua ogatasi ai le futia ma le umele. Ua leva foi ona tatau ona aumai le suiga lenei o le Tulafono. A fua foi i tausaga sa galue ai i le tatou Malo, ia, e 20 tausaga. A fua foi i ai, ua matua tele le suiga lea ua i ai. Ou te matua lagolagoina lenei suiga ua i ai, aua a fua i lau matau i ai i tausaga ua tuanai, sa tele lava ina faamalolo tagata le tumau mai mea nei e lua. 1. Ua le pulea le amio. 2. Ua i ai le solitulafono ua tupu mai i le tagata faigaluega.

O lau la tuualalo i lenei Tulafono ua aumai, ia faapena foi ona suisui a tatou faiga faavae, ia ogatasi le suiga lea e i luga o le tumutumu o le laau ma tagata faigaluega lautele ia o lo o i ai.

O le isi vaega ua ou vaai ai i le Tulafono, a faapea e faamalolo le tumau le tagata faigaluega po o le CEO ae leai se agasala, e toe totogi uma ia... O le isi la au tuualalo ma lau faafesili, e faapefea la le tulaga foi lenei ua faamalolo le tagata lea o le Ofisa Sili o Pulega, ae te i ua uma le masina lea na totogi ai ona aunoa lea e leai se totogi e maua, taofi ma le taavale, ae faamavae loa ma le CEO i le va lea. O lau tuualalo i le tulaga pe a faapea e tulai mai se tulaga faapea ua faamavae le Ofisa Sili o Pulega ona o le suesuega ae le i maea le suesuega, ia muamua faamuta loa i ina, ia terminate loa i ina le konekarate lea faigaluega ma totogi ai i ina penefiti e tusa ai ma faiga faavae o le tatou Malo. Ia, o si au fautuaga lea, ma e lagolagoina lenei Tulafono. Faafetai.

**FOFOGA FETALAI:** Ia, afai e i ai se isi sui usufono, o le a tulai mai le Malo se i saunoa i mea sa laga e sui usufono mamalu e ala i fautuaga.

**Susuga Hon TUILAEP AUELUA FATIALOFA LUPESOLIAI LOLOFIETELE NEIOTI AIONO GALUMALEMANA Dr. SAILELE MALIELEGAOI:** Lau Afioga i le Fofoga Fetalai, ia o le a taatia maia fautuaga ua aumai, ae e i ai lava si vaiiliu lea e tatau ona avatu ai pea sina faamatalaga. O lo o manino i lalo o tatou Tulafono o le Afaigaluega a le Malo le Public Service Act 2004 i le Vaega 12 o lo o faaali manino ai lava, o le Kapeneta e faia le faaiuga mulimuli. O le faaiuga mulimuli e fai e le Kapeneta i le tulaga lava lea ia i latou o e pulea Matagaluega ma Faalapotopotoga a le tatou Malo. O le Vaega 2 lea sa aumai e le sui usufono faatoa faamaui atu le tootoo, o le tulaga lea i le faamavae po o le itu foi o le faaaauu o le faaiuga, ua faamaonia ai se tulaga ua solitulafono. O lea foi la e i le Kapeneta le filifiliga e faatino ai. I le faamasinoga o le amiotonu, afai ua matua manino lava le tulaga o le solitulafono, e le talia e le Kapeneta se faamavaega i le itu lea o le faamasinoga o le amiotonu. E fai lava le iuga e tatau ona fai, faamuta, e le talia se faamavaega.

O le mafuaaga o le itu lea, ina ia matua mau i lalo o faamaumauga a le Malo le tulaga lapatai i le atunuu atoa, aemaise foi nisi kamupani e ono alu i ai le tagata lea e faigaluega ai, ina ia lapatai. Afai e solitulafono i i, o lona uiga, o le lamatia foi lena o se isi faalapotopotoga a le Malo e alu e galue ai, po o se isi faalapotopotoga tumaoti. Ua tatou lava ia, afai lava ua masani le tagata i le ituaiga soligatulafono lea o le puipuiiga o le amiotonu i isi faalapotopotoga e tatau ai ona aua ne i talia se faamavaega, aua o le faamavaega, o le isi lena togafiti e fai e le tagata lea ina ia aua ai ne i pipii faamaumauga ua aveese faamalosi. O le isi la sala, o le tagata ua faamuta, o le le mafai ona toe tapa ana entitlements uma lava lea sa i ai o ana faamanuiaga, o se vaega lena o lona faasalaga.

Lau Afioga i le Fofoga Fetalai, o le faamalamalamaga lena o le itu lea. Ia manuia le tatou Fono.

*Na faamaonia le lafo ma faitauina le Tulafono Tau Faaofi o Teuteuga Eese (Aiaiga o Totogi ina ua faamalolo le tumau mai le Galuega) 2020 i lona faitauga faalua.*

**FOFOGA FETALAI:** E tusa ai ma Tulafono Tumau, o le a tuuina atu le Tulafono Tau Faaofi i le Komiti o Tulafono Tumau, Mataupu tau Faiga Palota, Talosaga ma Tofiga faale-Faavae mo le iloilo ina ma toe lipoti mai ai i le Fono Aoa o se fonotaga o lumanai.

#### **TULAFONO TAU FAAOFI O LE PULEGA O MALOSIAGA 2020 – iloiloaga auiliili**

**FOFOGA FETALAI:** E tusa ai ma Tulafono Tumau, e ao ona faamaonia muamua e le Fono Aoa le Lipoti a le Komiti i le Tulafono Tau Faaofi ona avanoa ai lea mo le iloiloaga auiliili.

Ou te tapa ma le faaaloalo lau Afioga i le Taitaifono o le Komiti o Tupe Maua ma Tupe Totogi.

**Afioga ALIIMALEMANU ALOFA TUUAU (Taitaifono o le Komiti o Tupe Maua ma Tupe Totogi):** E faatalofa atu i lau Afioga i le Fofoga Fetalai faapea le mamalu o le Maota nei aemaise foi le faafofofoga tapuai mai a Samoa. E faatalofa atu foi i le Tamaitai Loia Sili a le tatou Malo.

Lau Afioga i le Fofoga Fetalai ou te faatu le lafo, *Ina ia faamaonia e le Fono Aoa le Lipoti a le Komiti o lo o fautuaina ai ina ia faagasolo le Tulafono Tau Faaofi o le Pulega o Malosiaga 2020 faatasi ma Teuteuga.*

*Faalua e le sui usufono mo Palauli le Falefa.*

**FOFOGA FETALAI:** E faasilasila atu ua faamaonia nei e le Fono Aoao le Lipoti a le Komiti i le Tulafono Tau Faaofi, ma o le a sagai atu loa le Fono Aoao mo le Iloiloga Auiliili.

E tusa ai ma Tulafono Tumau, e amata le iloiloga auiliili i le Fuaiupu 2.

**FUAIUPU 2: Faamatalaina o uiga o upu.**

**FOFOGA FETALAI:** O lo o i ai le teuteuga a le Komiti i le Fuaiupu 2 e pei ona faaalua i le Pepa Faaopoopo o Galuega.

Se i tulai mai le Afioga i le Taitaifono o le Komiti.

**Afioga ALIIMALEMANU ALOFA TUUAU:** Lau Afioga i le Fofoga Fetalai ou te faatu le teuteuga i le Fuaiupu 2 e faapea:

**“TEUTEUGA:**

Mo le uiga o le upu **“penisini”**, ia aveese le faaupuga **“peitai e le aofia ai penisini masani”**.

*Faamaonia le Teuteuga.*

*Faamaonia le Fuaiupu 2 e pei ona Teuteuina.*

**FUAIUPU 3: O le Tulafono e noatia ai le Malo.**

*Faamaonia.*

**FUAIUPU 4: Faamoemoega.**

*Faamaonia.*

**FUAIUPU 5: Faaaogaina.**

*Faamaonia.*

**FUAIUPU 6: Galuega tauave a le Minisita.**

*Faamaonia.*

**FUAIUPU 7: Galuega tauave a le Ofisa Sili o Pulega.**

*Faamaonia.*

**FUAIUPU 8: Tuuina atu o malosiaga.**

*Faamaonia.*

**FUAIUPU 9: Fuafuaga a le Vaega o Malosiaga a Samoa.**

*Faamaonia.*

**FUAIUPU 10: Komiti o Mataupu tau Malosiaga a Samoa.**

**FOFOGA FETALAI:** O lo o i ai le teuteuga a le Komiti i le Fuaiupu 10. Se i tulai mai le Taitaifono o le Komiti.

**Afioga ALIIMALEMANU ALOFA TUUAU:** Lau Afioga i le Fofoga Fetalai ou te faatu le teuteuga i le Fuaiupu 10 e faapea:

**“TEUTEUGA:**

I totonu o le fuaiupu 10(2), i le tuanai ai o le parakalafa (m), ia suia e faapea:

- “(n) Komesina o Leoleo;
- (o) Faatonu Sili Aoao o le Matagaluega o le Soifua Maloloina;
- (p) Pule Sili o le Faalapotopotoga o le Malosiaga Faa-Eletise; ma
- (q) Le Pule Sili o le Faalapotopotoga o Esetete Tausi a Samoa.”

**FOFOGA FETALAI:** Ia, se i tulai mai le sui usufono mo Faleata Sisifo.

**Tofa LEALAILEPULE RIMONI AIAFI (Faleata Sisifo):** Lau Afioga i le Fofoga Fetalai, ou te fia fesili atu lava i le Afioga i le Taitaifono ma le Komiti i le Komiti lea e filifili mai i i, ou te le o vaai i ai i le Komesina o Fuimu. Po o le a se mafuaaga ua leai ai i totonu o le Komiti lea. Ma le faaaloalo lava.

**FOFOGA FETALAI:** Ia, se i tulai mai le Taitaifono pe maua se fesoasoani i le fesili a le sui usufono.

**Afioga ALIIMALEMANU ALOFA TUUAU:** Lau Afioga i le Fofoga Fetalai o lena e i ai le Komesina o Fuimu. O le vaega e 4 lea na faalau atu, o isi o sui faaopoopo, ae o lena o lo o i ai, o tagata autu na o le Tulafono lena. Ma le faaaloalo lava.

**FOFOGA FETALAI:** Malo faafetai.

*Faamaonia le Teuteuga.*

*Faamaonia le Fuaiupu 10 e pei ona Teuteuina.*

**FUAIUPU 11: Failautusi.**

*Faamaonia.*

**FUAIUPU 12: Galuega tauave.**

*Faamaonia.*

**FUAIUPU 13: Fonotaga.**

**FOFOGA FETALAI:** O lo o i ai le Teuteuga a le Komiti i le Fuaiupu 13. Se i tulai mai le Taitaifono o le Komiti.

**Afioga ALIIMALEMANU ALOFA TUUAU:** Lau Afioga i le Fofoga Fetalai ou te faatu le teuteuga i le Fuaiupu 13 e faapea:

**“TEUTEUGA:**

Mo le Fuaiupu 13(3), ia suia e faapea:

**I le toesea ai mai so o se fonotaga o so o se sui o le Komiti Faatino i lalo o le fuaiupu 10(d) 0 (q), e mafai e lona sui ona ia faatagaina se tagata ofisa sinia mai lana Matagaluega e auai e avea ma ona sui i le fonotaga.**

*Faamaonia le Teuteuga.*

*Faamaonia le Fuaiupu 13 e pei ona Teuteuina.*

**FUAIUPU 14: Faaulufaleina mai, teuina ma le faasoasoina atu o penisini.**

*Faamaonia.*

**FUAIUPU 15: Faatulagaina o tau o oloa tau penisini.**

*Faamaonia.*

**FUAIUPU 16: Faaeeina atu o lafoga ma totogifuapauina.**

*Faamaonia.*

**FUAIUPU 17: Tulaga faataatitia o penisini.**

*Faamaonia.*

**FUAIUPU 18: Faatau atu i oloa taitasi o penisini e aunoa ma se laisene.**

*Faamaonia.*



**FUAIUPU 19: Laisene.**

**FOFOGA FETALAI:** O lo o i ai le teuteuga a le Komiti i le Fuaiupu 19. Se i tulai mai le Taitaifono o le Komiti.

**Afioga ALIIMALEMANU ALOFA TUUAU:** Lau Afioga i le Fofoga Fetalai ou te faatu le teuteuga i le Fuaiupu 19 e faapea:

**“TEUTEUGA:**

Mo le Fuaiupu 19, ia suia e faapea:

**“19. Laisene e fausia ai, faagaioioia, tagofia, feaveai po o le teuina o penisini:**

(1) A o lumanai ai le tuuina atu o se laisene i lalo o le faafuaiupu (2), e ao i se tagata ona ia uluai talosaga i le Ofisa Sili o Pulega mo se laisene le tumau i luga o tuutuuga e amataina ai galuega faa-kamuta e tusa ai o se pamu penisini.

(2) E mafai e se tagata ona talosaga i le Ofisa Sili o Pulega mo se laisene:

(a) e faagaioioi ai se nofoaga o pamu penisini mo le faatauina atu o penisini i tau taitasi;

(i) ina ua maea galuega faa-kamuta lea na tuuina atu ai se laisene le tumau i luga o aiaiga i lalo o le faafuaiupu (1) po o

(ii) pe afai na faamoemoe lea tagata e faagaioioi se nofoaga o pamu penisini o i ai nei; po o

(b) le taulimaina, fesiitai po o le teuina foi o le penisini mo le a lava le faamoemoe.

(3) O se tusi talosaga mo se laisene i lalo o lenei fuaiupu e ao ona:

(a) faia i totonu o se pepa faatumu ua faamaonia; ma

(b) ia tuuina atu faatasi ma le totogifuapauina ua faatonuina.

(4) E tatau i le Ofisa Sili o Pulega ona:

(a) faatino i se uluai iloiloga o le talosaga ua taulimaina i lalo o lenei fuaiupu ma, afai e talafeagai ai, ia amanaia mataupu ua faamaotiina i totonu o le fuaiupu 20; ma

(b) faasee atu le talosaga faatasi ai ma fautuaga i le Vaega Faapitoa e Galulue i Penisini mo iloiloga mulimuli ma le faamaoniga.

(5) O se laisene e manaomia i lalo o lenei fuaiupu e faaagaaga faapitoa mo na o tagatanuu o Samoa, ma e le mafai ona tuuina atu se faamaoniga i lalo o lenei Tulafono, po o so o se isi lava

tulafono, mo se tagata e le o se tagatanuu o Samoa e tuuina atu i ai i se laisene mo faamoemoega o lenei fuaiupu, po o se isi faamoemoega faapena.

(6) Mo le faamoemoe o lenei fuaiupu, “tagatanuu” o lona uiga, o se tagata o ia lea ua maua lona tulaga o tagatanuu o Samoa i lalo o le Tulafono o Tulaga o Tagatanuu 2004, ae vagana ai e faapea o se tagata na maua lona tulaga o tagatanuu e ala i le faaiipoipoga po o, e ala i le nofomau, po o se tulaga o tagatanuu e ala i tupe teu faafaigaluega, e agavaa o ia mo se laisene i lalo o lenei fuaiupu ina ua faamalieina aiaiga, e aofia ai ae peitai e le faatapulaaina i itu nei, e pei ona fuafuaina e le Ofisa Sili o Pulega a le Matagaluega:

(a) o le aofaiga manaomia o tausaga e nofomau ai i totonu o Samoa;

(b) o le poto masani ma le atamai ua faamaonia le faagaioiga o se pamu penisini;

(c) o le poto masani ma le atamai na faamaonia i tulaga faataatitia talafeagai o le saogalemu ma manaoga e faasino tonu i le faagaioiga o se pamu penisini;

(d) o le tupe faavae manaomia;

(e) ma le tulaga o le a manuia ai le tamaoaiga o Samoa;

(f) e faapea o lo o faatino mo le manuia o le atunuu lautele;

(g) e faapea o lo o faautaitia e se tagata ua faatagaina po o, ua laiseneina na te faatinoina;

(h) ma nisi lava tuutuuga po o taiala e pei ona mafai ona manaomia e le Ofisa Sili o Pulega.

(7) O se tagata ua aafia ai i lalo o le tuusaunoaga i le faafuiauupu (6), pe afai e faamaonia, e tatau ona na o le faa-tasi ona faamatuu atu i ai se laisene. Mo le alofia ai o se tulaga le mautinoa, o lenei aiaiga o le a le aafia ai le aia tatau e toe faafou ai le laisene muamua.

(8) O se laisene e tuuina atu i lalo o lenei fuaiupu o le a le mafai ona toe faaliliuina ese atu”.

**FOFOGA FETALAI:** Tulai mai le sui usufono mo Faleata Sisifo lau Afioga Lealailepule.

**Tofa LEALAILEPULE RIMONI AIAFI:** Faafetai lava i le suiga umi a le Komiti. Faafetai aua o lea ua... o le mea lea e masani ona faitio i ai tagata, o le mea foi lea o le siisii o le tau o le penisini, a o lea la ua aumai, o lea ua seki mai le tau lea i le masina atoa le ceiling price. Aua o le mea lea e tupu nei e te i lava ua sii mai e tatou, a o le uta lava lea na aumai i le tau mauualalo. A o le mea la lea e fia fesili ai i laisene lau Afioga, pe le i tagai le Komiti e i ai se tapulaa o laisene pamu penisini? E le ono i ai se tapulaa foi lele e fua

i le aofai o le atunuu ma tulaga uma faapena? E le alu faatauva? E pei la o se faaitaiga o i i Vaitele, o lea ua 3 nei pamu penisini la e i ai. O se mea lelei i le isi itu, ae vaai foi la i le isi itu i tagata o lo o faia nei atinae. O le mea lena, pe le i tagai le Komiti i lea vaega.

O le isi vaega taua, o pamu penisini. Faafetai lava i le tele o pamu fou lea ua fai nei, ua lelei le faatinoina atoa a o isi pamu penisini lea e i ai i le taimi nei, o lau vaai e le o saogalemu. E le gata i le foliga mai, a o conditions foi nei i mea e o atu i ai taavale ma mea e utu ai ma fale e operate mai ai. Pe na tagai i ai le Komiti i lea vaega. Ma le faaaloalo lava. Faafetai.

**FOFOGA FETALAI:** Malo faafetai mo le fautuaga. Ia, se i vagana ua i ai se finagalo... a o lea faapea e lafo mai lou finagalo i le Komiti o lea e faafofoga atu.

Ia, tulai mai le Taitaifono o le Komiti.

**Afioga ALIIMALEMANU ALOFA TUUAU:** Lau Afioga i le Fofoga Fetalai o lea sa oo i ai se faatalanoaga a le Komiti. Manatua foi tatou e lavea i le mea lea o le maketi saoloto. O le aia tatau lava la a le tagata pe a fia faatu lea ituaiga pisinisi e faatu ai lana pisinisi, ae leai se tatou Tulafono e faatapulaa ai le aofai o ni pamu penisini a se isi. Na pau le mea lea e i ai i totonu o le Tulafono, o le va o le isi pamu i le isi pamu. O le itu taua lena ia aua ne i vavalalata ae talitonu foi i le tulaga lea ua taua o le saogalemu, o le aoga tonu lena o le Komiti lea sa faalaulau atu lea ua faaopoopo i ai ma isi Ofisa Sili o Pulega o Matagaluega e toa-4, o le latou matafaioi tonu lava lea o le vaavaai o le saogalemu, o le faataatiaina o paipa o galuega faa-kamuta a o le i oo i le tulaga o le a tatalaina ma tuuina atu i ai le laisene.

O le tali atu lea ma le faaaloalo lava.

**FOFOGA FETALAI:** Malo. Ia se i tulai mai le sui uufono mo Aleipata Itupa i Lalo.

**Afioga TAFUA MALUELUE TAFUA (Aleipata Itupa i Lalo):** E faatalofa atu i lau Afioga i lenei taeao fou. E leai na ona fesiligia le fesili a Lealailepule, po o silafia e Lealailepule o la e i ai foi e i ai nai au pamu penisini i Fugalei ma le pamu lea i Fagalii. O lea la ou te popole, a fai le mea lea e finagalo i ai Lealailepule, e taua tele le pamu lea i Fagalii mo i matou lea e o i tua. E momoli atu ai le agaga faafetai i le tulaga lea. Malie ia lau Afioga, o lea ou te tau masalosalo o le fesili a Lealailepule, pei e faatutu mai i lau Afioga ma au pamu penisini. Ae o le matua aoga lava o pamu la e i ai, ma le faaaloalo.

**Tofa Lealailepule Rimoni Aiafi:** Lau Afioga i le Fofoga Fetalai, o la e galo i le sui mamalu le isi pamu fou la e i Lotopa, ae le o le agaga lea o lau fesili lau afioga. O le agaga o lau fesili, e le i faapito i se tagata e toatasi

faamalie atu ai i le sui usufono, o lea e faalauaitetele lou manatu. Leaga e moni le Taitaifono o mea ia o open market ae fuafua foi e tatou, e ia i tatou malosiaga e fua i ai pisinisi, i lea pisinisi. Ma le faaaloalo lava.

**FOFOGA FETALAI:** Malo faafetai. Tulai mai le sui usufono mo Palauli le Falefa.

**Afioga Hon FAUMUINA TIATIA FAAOLATANE LIUGA (Palauli le Falefa):** Lau Afioga i le Fofoga Fetalai, o le mea tonu lava lea o lea e fai ai le Tulafono lea, ina ia tuufaatasia taiala ma Faiga Faavae, ia pulea ai ia le faafoeina o le gaosia ma le tufatufaina o le malosiaga tau penisini ma mea faapena. O le ala lena o le Tulafono lea, ina ia mautinoa ai o mulimulitaia taiala i lalo o se faamalu e tasi. Ma lou faaaloalo lava.

**FOFOGA FETALAI:** O lea ua maua atu le faamalamalamaga e le afioga ia Faumuina e tusa ai ma le mataupu lea i lona aotelega, ina ia faapena ona...so o se mea lava e maafafuagalu le Malo ina ia faatino se Tulafono e lima taitaiina ai, pe control ai lea vaega ma lea tulaga.

*Faamaonia le Teuteuga.*

*Faamaonia le Fuaiupu 19 e pei ona Teuteuina.*

**FUAIUPU 20: Nisi faamatalaga manaomia.**

*Faamaonia.*

**FUAIUPU 21: Mataupu e ao ona iloiloina.**

**FOFOGA FETALAI:** O lo o i ai le Teuteuga a le Komiti i le Fuaiupu 21, tulai mai lau Afioga i le Taitaifono.

**Afioga ALIIMALEMANU ALOFA TUUAU:** Lau Afioga i le Fofoga Fetalai, ou te faatu le Teuteuga i le Fuaiupu e 21 e faapea;

**“TEUTEUGA:**

Mo le Fuaiupu 21, ia suia e faapea: “Fuaiupu 21. Mataupu e ao ona iloiloina: I le faia ai o se faaiuga o se talosaga mo se laisene i lalo o le fuaiupu 19(1), e ao i le Ofisa Sili o Pulega ona iloilo mataupu nei.

- (a) O se maliega tau atinae ua tuuina tu i lalo o ole Tulafono o Fuafuaga ma Puelga o Nofoga o Taulaga 2004, e faamaonia ai e faapea, e mafai ona fausia lea atinae i luga o lea fanua.
- (b) O se pemitā o fale mai le Matagaluega o Galuega, Felauaiga ma Atinae Eseeese, e faamaonia ai ua faamalieina manaoga uma tau fale i lalo o Tulafono Laiti o Fale o le Atunuu 2017.
- (c) O se tusi faamaonia ua tuuina atu e le Komesina o le Pulega o Auauanaga Tau Tineimu ma Faalavelave Faafuasei e faamaonia ai e faapea ua maea ona faaleleia ma faamalieina iloiloga uma o tulaga talafeagai pe a tulai mai se mu.
- (d) O se tusi faamaonia e tuuina atu e le Pulega o Felauaiga i luga o le Lauelele e faamaonia ai ua faamalieina manaoga nei:
  - (i) O nofoaga e ulufale ma ulufafo ai ma so o se paka i tafaala o le nofoaga ua fuafuaina ina ia aua nei tulai mai ai se faafitauli i taavale feoai i se tulaga le talafeagai ai; ma
  - (ii) O nofoaga e lafoai ai le suavai i alavai ina ia fausia i nofoaga talafeagai e fesootai sao atu i alavai mo suavai lafoai a le Pulega o Felauaiga i luga o le Lauelele, pe a talafeagai ai.
- (e) O faamatalaga molimau o le tulaga umia ai po o le aia tatau e faaaogaina ai lea fanua ua fausia ai le galuega tau atinae ua fuafuaina.
- (f) O le itu talafeagai e tuuina atu ai se laisene mo se pamu penisini i lea fanua e faasino i ai le talosaga (e aofia ai iloiloga alagatatau i le tulalata ma isi pamu penisini)
- (g) O le naunautaiga o le tagata talosaga e usitaia noataga a se tagata ua laiseneina.
- (h) O le manuia o tagata lautele, ma
- (i) So o se isi lava mataupu ua manatu le Ofisa Sili o Pulega ua talafeagai ai.

*Faamaonia le Teuteuga.*

*Faamaonia le Fuaiupu 21 e pei ona Teuteuina.*

**FUAIUPU 22: Tuuina atu o laisene, umi o le taimi e aoga ai, faafouga ma tuutuuga o le laisene.**

*Faamaonia.*

**FUAIUPU 23: Faaleaogaina po o le taofia le tumau o le laisene.**

*Faamaonia.*

**FUAIUPU 24: Talosaga tetee mo laisene.**

*Faamaonia.*

**FUAIUPU 25: Malosiaga e ulufale ai, aveese, suesueina pe faoa faamalos.**

*Faamaonia.*

**FUAIUPU 26: Faataatiaga o paipa ma isi galuega.**

*Faamaonia.*

**FUAIUPU 27: Tulafono faatonutonu o penisini.**

*Faamaonia.*

**FUAIUPU 28: Vaega Faapitoa e galulue i Penisini.**

**FOFOGA FETALAI:** O lo o i ai le teuteuga a le Komiti i le Fuaiupu 28. Se i tulai mai le Taitaifono o le Komiti.

**Afioga ALIIMALEMANU ALOFA TUUAU:** Lau Afioga i le fofoga Fetalai ou te faatu le Teuteuga i le Fuaiupu 28 e faapea;

**“TEUTEUGA:**

I totonu o le Fuaiupu 28(2), ia faaofi i le tuanai ai o le parakalafa  
(g) e faapea:  
(h) Komesina o Leoleo

- (i) Pule Sili o le Faalapotopotoga o Malosiaga faa-Eletise; ma
- (j) le Ofisa Sili o le Onshore ma le Terminal Distribution Operator.

*Faamaonia le Teuteuga*

*Faamaonia le Fuaiupu 28 e pei ona Teuteuina.*

**FUAIUPU 29: Failautusi.**

*Faamaonia.*

**FUAIUPU 30: Galuega tauave.**

*Faamaonia.*

**FUAIUPU 31: Fonotaga**

*Faamaonia*

**FUAIUPU 32: Faamalosia.**

*Faamaonia.*

**FUAIUPU 33: Tapulaa Maualalo o Faatinoga Tau Malosiaga ma le Faia o Pepa Igoa o Oloa.**

*Faamaonia.*

**FUAIUPU 34: Tulaga faasaina.**

*Faamaonia.*

**FUAIUPU 35: Resitalaina.**

*Faamaonia.*

**FUAIUPU 36: Aiaiga o le resitalaina.**

*Faamaonia.*

**FUAIUPU 37: Suega ma suesuega.**

*Faamaonia.*

**FUAIUPU 38: Aloaia o le resitalaina.**

*Faamaonia.*

**FUAIUPU 39: Suiga i le resitala.**

*Faamaonia.*

**FUAIUPU 40: Faaleaogaina o le resitalaina.**

*Faamaonia.*

**FUAIUPU 41: Malosiaga faapitoa o tagata ofisa faatagaina.**

*Faamaonia.*

**FUAIUPU 42: Tusi resitala o oloa.**



*Faamaonia.*

**FUAIUPU 43: Lafoaia o oloa.**

*Faamaonia.*

**FUAIUPU 44: Faamatalaga mo faamoemoega tau i fuainumera faamauina.**

*Faamaonia.*

**FUAIUPU 45: Soligatulafono ma faasalaga i lalo o lenei Vaevaega.**

*Faamaonia.*

**FUAIUPU 46: Soloaiga.**

*Faamaonia.*

**FUAIUPU 47: Sootaga aloaia ma isi pulega a le Malo.**

**FOFOGA FETALAI:** O lo o i ai le Teuteuga a le Komiti i le Fuaiupu 47. Faamolemole tulai mai lau Afioga i le Taitaifono, mo le teuteuina o le Fuaiupu 47.

**Afioga ALIIMALEMANU ALOFA TUUAU:** Lau Afioga i le Fofoga Fetalai, ou te faatu le Teuteuga i le Fuaiupu 47 e faapea;

**“TEUTEUGA:**

I totonu o le Fuaiupu 47(2), ia faaofi i le tuanai ai o le parakalafa (e) e faapea;  
**(f) O le Matagaluega o Leoleo.**

*Faamaonia le Teuteuga.*

*Faamaonia le Fuaiupu 47 e pei ona teuteuina.*

**FOFOGA FETALAI:** E i ai le manatu ua faaaaogagase le Palemene, ae sa taumafai ina ia faapena ona maea le iloiloga auilili o le Tulafono ae tatou te le i o i le tatou malologa.

Ae ui i lea, e i ai le manatu, o le a faataatiaese galuega a le Fono Aoaو Faitulafono mo lana malologa masani.

*Na faataatiaese Tualumaga a le Fono Aoaو Faitulafono mo lana malologa masani i le itula e 10:55 i le taeao ma toe faaauau i le itula 11:46 i le taeao.*

**FOFOGA FETALAI:** Ou te faasilasila atu ua toe amatalia Tualumaga ma Galuega a le Fono Aoaو Faitulafono. Ua manatu foi le Nofoa ua faaopoopoina le faasiligamalosi, i le paia i le Taitai o le Malo ma le Kapeneta ae faapea foi le paia i le Palemene, aemaise foi o Ofisa Sili o Pulega o Matagaluega a le Malo ma Faalapotopotoga. Malo le onosai.

E faataatiaese Tualumaga a le Fono Aoaو ua faagasolo le Iloiloga Auiliili o le Tulafono Tau Faaofi o le Pulega o Malosiaga 2020. E faia le malologa ua maea le Fuaiupu 47, ae ua oo mai le faasologa o le Iloiloga Auiliili i le Fuaiupu 48.

**FUAIUPU 48: Galuega tau atinae o malosiaga ma galuega e fesootai i ai.**

*Faamaonia.*

**FUAIUPU 49: Manaoga mo galuega tau atinae.**

*Faamaonia.*

**FUAIUPU 50: Tala Faatatau o le Tupe.**

*Faamaonia.*

**FUAIUPU 51: Totogifuapauina, lafoga ma isi tau faaee atu.**

*Faamaonia.*

**FUAIUPU 52: Tofiaina o Tagata Ofisa Faatagaina.**

*Faamaonia.*

**FUAIUPU 53: Malosiaga lautele.**

*Faamaonia.*

**FUAIUPU 54: Aia tatau ma tiute o le e ona po o le tagata o lo o ia faafoeina.**

*Faamaonia.*

**FUAIUPU 55: Tulaga le tausisia i le uluai asiasiga.**

*Faamaonia.*

**FUAIUPU 56: Faasilasilaga o tulaga tausisia.**

*Faamaonia.*

**FUAIUPU 57: Tulaga le tausisia i le asiasiga ua toe faia.**

*Faamaonia.*

**FUAIUPU 58: Faasea e faasaga i se tagata ofisa faatagaina.**

*Faamaonia.*

**FUAIUPU 59: O le le mafai ona tuuina atu faamatalaga ma tulaga faalavelaveina.**

*Faamaonia.*

**FUAIUPU 60: O le le mafai ona tausisia.**

*Faamaonia.*

**FUAIUPU 61: Matafaioi a tagata e ona galuega mo gaoioiga a tagata faigaluega.**

*Faamaonia.*

**FUAIUPU 62: Ia tausisia e le Matagaluega se tusi resitala.**

*Faamaonia.*

**FUAIUPU 63: O puipuiga faaletulafono tau le tagata ofisa lava ia ma tagata faigaluega.**

*Faamaonia.*

**FUAIUPU 64: Faamatalaga agatapuia ma le faailoaina atu i tulaga faapitoa.**

*Faamaonia.*

**FUAIUPU 65: Faailoaina atu o aia.**

*Faamaonia.*

**FUAIUPU 66: Tulafono Faatonutonu.**

*Faamaonia.*

**FUAIUPU 67: Pepa faatumu faamaonia.**

*Faamaonia.*

**FUAIUPU 68: Soloia.**

*Faamaonia.*

**FUAIUPU 69: Aiaiga faasaoina ma aiaiga tau soloaiga.**

*Faamaonia.*

**FUAIUPU 1 MA LE IGOA:**

**FUAIUPU1: Igoa puupuu ma le amataga.**

**IGOA: Tulafono o le Pulega o Malosiaga 2020**

**FOFOGA FETALAI:** O lo o i ai le Faasaoga a le Komiti i le Fuaiupu 1 ma le Igoa.

Se i tulai mai lau Afioga i le Taitaifono o le Komiti.

**Afioga ALIIMALEMANU ALOFA TUUAU:** Lau Afioga i le Fofoga Fetalai, ou te faatu le Faasaoga i le Igoa o le Tulafono e faapea;

**“FAASAOGA:**

Ia aveese le upu Pulega ma suia i le upu Faafoega ma faitauina ai le Igoa o le Tulafono e faapea;

**“Tulafono o le Faafoega o Malosiaga 2020.”**

*Faamaonia le Faasaoga.*

*Faamaonia le Fuaiupu 1 ma le Igoa e pei ona faasaoina.*

*Na faagasolo le Tulafono Tau Faaofi o le Faafoega o Malosiaga 2020 faatasi ma Teuteuga ma Faasaoga.*

**TULAFONO TAU FAAOFI E SOLOIA AI NI TULAFONO  
MAI LE UPEGA O TULAFONO 2019 – iloiloga auiliili.**

**FOFOGA FETALAI:** E tusa ai ma Tulafono Tumau e ao ona faamaonia muamua e le Fono Aoao le Lipoti a le Komiti i le Tualfono Tau Faaofi ona avanoa ai lea mo le Iloiloga Auiliili.

Ou te tapa lau Afioga i le Taitaifono o le Komiti o Tulafono Tumau, Mataupu tau Faiga Palota, Talosaga ma Tofiga faale-Faavae.

**Tofa NAFOITOA TALAIMANU KETI (Taitaifono o le Komiti o Tulafono Tumau, Mataupu tau Faiga Palota, Talosaga ma Tofiga faale-Faavae):** Lau Afioga i le Fofoga Fetalai, ou te tulai ma le faaaloalo e faatu le lafo, *Ina ia faamaonia e le Fono Aoao le Lipoti a lenei Komiti, o lo o fautuaina ai ina ia faagasolo le Tulafono Tau Faaofi e Soloia ai ni Tulafono mai Upega o Tulafono 2019 faatasi ma Faasaoga.*

*Faaluaina e le sui usufono mo Falealili Sisifo, sui usufono mo Falealili Sasae ma le sui usufono mo Lefaga ma Faleaseela.*

**FOFOGA FETALAI:** Ou te faasilasila atu ua faamaonia nei e le Fono aoao le Lipoti a le Komiti i le Tulafono Tau Faaofi, ma o le a sagai atu loa le Fono Aoao mo le Iloiloga Auiliili.

E tusa ai ma le Tulafono Tumau e amata le Iloiloga auiliili i le Fuaiupu 2.

**FUAIUPU 2: Soloia o Tulafono ma Tulafono na pasia a o lumanai le Tutoatasi.**

*Faamaonia.*

**FUAIUPU 3: Aiaiga faasaoina ma aiaiga tau soloaiga.**

*Faamaonia.*

**FUAIUPU 1 MA LE IGOA**

**FUAIUPU 1: Igoa puupuu ma le amataga**

**IGOA: Tulafono e Soloia ai ni Tulafono mai le Upega o Tulafono 2019.**

**FOFOGA FETALAI:** O lo o i ai le faasaoga a le Komiti i le Fuaiupu 1 ma le Igoa.

Tulai mai le Afioga i le Taitaifono.

**Tofa NAFOITOA TALAIMANU KETI:** Lau Afioga i le Fofoga Fetalai, ou te faatu le faasaoga i le Fuaiupu 1 ma le Igoa o le Tulafono e faapea;

**“FAASAOGA:**

Ia aveese le fuainumera 2019 ma suia i le fuainumera 2020 ma faitauina ai le Igoa o le Tulafono e faapea;

**“Tulafono e Soloia ai ni Tulafono mai le Upega o Tulafono 2020.”**

*Faamaonia le Faasaoga.*

*Faamaonia le Fuaiupu 1 ma le Igoa e pei ona Faasaoina.*

*Na faagasolo le Tulafono Tau Faaofi e soloia ai ni Tulafono mai le Upega o Tulafono 2020 faatasi ma le Faasaoga.*

**LAFO MO LE FAATAATIAESE O TULAFONO TUMAU**

**FOFOGA FETALAI:** Ou te tapa ma le faaaloalo lau Afioga i le Taitai o le Malo.

**Susuga Hon TUILAEP AUELUA FATIALOFA LUPESOLIAI LOLOFIETELE NEIOTI AIONO GALUMALEMANA Dr. SAILELE MALIELEGAOI:** E tulai atu ma le faaaloalo e faatu le lafo, *Ina ia*

*faataatiaese Tulafono Tumau 101(1), ina ia avanoa ai le faitauga faalua o Tulafono ia sa faitauina muamua i le taeao nei.*

*Faaluuaina e le Minisita mo Pisinisi, Alamanuia ma Leipa.*

*Na faamaonia le lafo.*

## **TULAFONO TAU FAAOFI O TEUTEUGA O LE TULAFONO O LE FAASOLOGA O TIUTE 2020 – faitauga faalua.**

**FOFOGA FETALAI:** Ou te tapa lau Afioga i le Minisita mo Tupe Maua.

**Afioga Hon TIALAVEA FEA LENIU TIONISIO HUNT:** Lau Afioga i le Fofoga Fetalai, ou te faatu le lafo, *Ina ia faitauina nei le Tulafono Tau Faaofi o Teuteuga o le Tulafono o le Faasologa o Tiute 2020 i lona faitauga faalua, ma ou te fia tautala faamalamalama i ai.*

*Faaluuaina e le Minisita o Tupe ma le Minisita mo le Soifua Maloloina.*

**FOFOGA FETALAI:** Ua avanoa le Maota mo lau saunoaga lau Afioga i le Minisita.

**Afioga Hon TIALAVEA FEA LENIU TIONISIO HUNT:** Faafetai i lau Afioga i le Fofoga Fetalai faapea foi le paia i le Palemene. O le Tulafono lea e puupuu lava. O le Tulafono lenei, e mafai ai ona aveesea le excise tax i luga o taavale ia e alu i le eletise. E eletise atoatoa lava, e le o lavea ai le vaega lea e alu i le eletise ma le penisini. E na o taavale lava e faaaogaina le eletise atoa. O le excise tax e 5% lea ua aveese. O taavale la ia e mafai ona aumaia i totonu o le atunuu, mo le 2 tausaga o lumanai nei, e leai se tiute o toe i ai i taavale ia, vagana le excise tax e 5%. O isi uma taavale, ia e o faatasi le penisini ma le eletise ae o lo o tumau pea le 5% o le excise tax ma le 15% o le VAGST. E le o aafia foi i le faamamaavega nei ia parts o taavale nei. O lo o totogi lava tiute pe a aumai ni parts faaletonu o taavale nei, vagana lava ia taavale atoatoa o le faamamaavega lena. E mafai foi ona oka e so o se tasi, pisinisi e mafai ona latou okaina le taavale ma e lavea uma lava i le duty free lea, o le excise tax e aveese. E oo foi i le vaega lea e okaina taavale o car dealers, e mafai foi ona latou maua le avanoa lea e oka ai e latou taavale nei i totonu o le atunuu. E le o faatapulaaina mo se vaega, o lea e tuu saoloto atoa i le taumafai e aumai i totonu taavale nei, ina ia fesoasoani foi i le faalaititia o le alu o le penisini. Ma na o le 2 tausaga, e faagata mai i le 2022 ona toe Iloilo lea o le Tulafono lau Afioga.

E puupuu lava le Tulafono, e pau na o Vaega o le Tulafono lau Afioga. Faafetai.



**FOFOGA FETALAI:** Se i tulai mai le Palemia.

**Susuga Hon TUILAEP AUELUA FATIALOFA LUPESOLIAI  
LOLOFIETELE NEIOTI AIONO GALUMALEMANA Dr. SAILELE  
MALIELEGAOI:**

Lau Afioga i le Fofoga Fetalai, pe a ma le 8 tausaga talu ai sa talosaga mai ai se tasi o tagata faipisinisi na te fia aumaia taavale nei e alu i le eletise, e le alu i le penisini. E le i talia e le tatou Komiti e fautuaina ia fesoasoani mea tau incentives e uunaia i latou nei, e aumaia taavale i totonu o le atunuu, ona e le talafeagai ma le Tulafono. O lona uiga seiloga e teuteu le Tulafono, o lea la ua teuteu. O le tulaga taua tele i le faamoemoe lenei, o le taumafai ai lea e taofiofi le aumai o penisini ia e faatupulaia ai le afaina o le siosiomaga o le lalolagi, ma atili ai ona tupu tele le vevela. Ma ono agai atu ai i le sea level rise le liusuavai uma o aisa o lo o loka mau i le pole i Matu ma le pole i Saute o le lalolagi. O le aisa lena e loka mau i ina, e oo loa i le taimi e vevela ai le lalolagi ona liusuavai loa lea ma magoto uma ai le tele o vaega tu maualalo o gataifale uma o Malo tetele faapena foi ma Samoa. Ia o lona uiga o le isi lea auupega o lo o agai i ai Malo tetele o le lalolagi, o so latou sao lea e tuuitiitia ai le mala lea ua faamalumu mai i le lalolagi atoa. Ae muamua lava aafia ai atunuu laiti, atunuu e pei ona i ai Samoa, e vave magoto uma i le moana atunuu e maualalo le maualuga o latou fogaelele, latou nei e fausia mai le amu, le amu manu.

Lau Afioga i le Fofoga Fetalai, o le tulaga lena e mafua ai le fautuaga lenei, ona o lea ua matauina e le tele o Malo ua agai i le faaaoga o taavale ia e o i le eletise ma taofia ai le soona toe faaulufale mai i totonu o le suauu lea e afua ai le mafanafana o le lalolagi, ma o le ki atoa lea o le mala o lo o feagai ma le lalolagi i le taimi lenei, ia taofia le siisii i luga o le mafanafana. O mea o fuafuaga mamao uma a Malo uma o le lalolagi i le taimi lenei, toe 80 tausaga ia e totoe e tatau ai ona taofi le fesuaiga o le tau, taofiofi i lalo o le 1.5% degree centigrade le mafanafana. O le vaaiga lea ua i ai nei a Saientisi, tatou te le ausia le tulaga lena, pe afai ae le ioe atunuu tetele o le lalolagi. O mea la nei ua faia e atunuu uma ina ia faaopoopo atu i se taumafaiga a lea, faaopoopo faatasi atu ma le taumafaiga a isi, ona mafai ai lea ona tatou ausia le faamoemoe lena ina ia taofiofi le vevela o le lalolagi ia aua lava ne i siitia atu i luga o le 1.5% degree centigrade. Sa matou auai i le sainia o le feagaiga lea i Palisi i le faaiuga o le 2015 ma o i tonu lava lea na agai uma i ai, leaga o le ki ma le tatala lena o nei taumafaiga uma e fai e aafia ai foi ma Samoa i le totonu atili o laau e mitiia ai le kasa vevela lea. O le taumafai ia taofiofi le siitia o le vevela ia tumau i le 1.5. O mea uma lava la lea tatou te faia nei lea e faaautu i gaoioiga a le MNRE faapea foi ma le Ofisa o Faatoaga i le tau taofiofiga o le taina o le vaomatua, e agai tasi uma lava i le mea lea o le taofiofiga o le vevela ia aua ai ne i liusuavai aisa ia, ma iu ai ina tanumia ma magoto i le moana le tele o eleele tu matafaga. E le na o tatou la e aafia ai, aua o laumua tetele o Malo o le lalolagi e faapei o Uosigitone, e faapena foi

Ueligitone, o aai tetele, o Tokyo ma le tele o Malo, e na o nai futu lava le maualuga mai le sami e maualuga ae i luga. O lona uiga o mea e tutupu i Samoa e tutupu uma a i le lalolagi atoa. E le na o Samoa la e aafia ai, e aafia uma le lalolagi atoa, ma ua faamautinoa nei i fonotaga tetele ia a le lalolagi e le i leva atu nei, e le taitai lava sao o atunuu nei e fai e oo foi ia Samoa. E tatau ona toe faaopoopo nisi mea e le taitai lava, pe afai tatou te fia ausia le 1.5 degree by the Year 2100, le 80 tausaga ia e totoe.

Lau Afioga, o le tatou sao faaopoopo lea ina ia uunai ai tagata e lau mai taavale ia, o le matua taugata ae o le aveeseina o le tiute lea po o le tuuitiitia o le tiute, o le tatou sao faaopoopo lea e ave foi i tatou lipoti i le tuufaatasiga o taumafaiga a atunuu uma o le lalolagi, o le isi lea gaoioiga toa ma le taua o lo o taumafai i ai le tatou Malo.

Lau Afioga i le Fofoga Fetalai, o le faamatalaga faaopoopo lena i le tulaga ua mafua ai ona fai le suiga lena i le Teuteuga o le Tulafono.

**FOFOGA FETALAI:** Malo faafetai.

**Tofa Olo Fiti Afoa Vaai:** Lau Afioga i le Fofoga Fetalai pe maua se avanoa.

**FOFOGA FETALAI:** Ia, o le a tuu atu le avanoa ae le umi aua sa tatau ona e afio mai i le tatou Semina ananafi.

**Tofa OLO FITI AFOA VAAI:** E sao lava lau Afioga, a o ita ia o totonu lava o le Palemene na tuli mai ai ita e lou itumalo. Ae lau Afioga, faafetai foi ua topetope foi sia mea.

**Susuga Hon Tuilaepa Auelua Fatialofa Lupesoliai Lolofietele Neioti Aiono Galumalemana Dr. Sailele:** Lau Afioga i le Fofoga Fetalai, o se mea e fia faasao.

**FOFOGA FETALAI:** Se i tulai mai le Taitai o le Maota.

**Susuga Hon Tuilaepa Auelua Fatialofa Lupesoliai Lolofietele Neioti Aiono Galumalemana Dr. Sailele:** O le fonotaga lena e fai e faamalamalama ai Tulafono, o se suiga tele lea ua faia pe a ma le 10 tausaga talu ai, ona o le mea sa fai i o matou taimi, e oo mai loa lava... e table loa Tulafono, na ona table lava talanoa loa, e leai lava ma se taimi e toe avanoa. O lona uiga o isi o matou e na o le 30 minute e faitau ai Tulafono, 30 minute. O le ala lena e masani ona faatauemu ai upu i nai o tatou tama faipule sa i ai, ae faapea na o le io lava, io le malamalama. Sa matou io foi tau le malamalama i o matou foi taimi, lea ou te talanoa atu i le lata i le 40 tausaga talu ai na ou ulufale mai ai i le Maota lena. E te faitau faatopetope. O se suiga tele ma le aoga le faavagavaga o le aso atoa e omai ai Ofisa Sili o

Pulega ma le Loia Sili e faamatala auiliili Tulafono nei i alii ma tamaitai faipule. O a tulaga e le malamalama ai, e faamalamalama ai. Ia manatua foi o latou o lima taumatau o le Malo, e leai so latou avanoa e toe tautala mai ai i le taimi lenei, na o tatou lea e felafolafoai i Tulafono. A o le tomai atoa o latou ma le latou poto masani, lea ua tatala mai i le aso faapitoa ina ia fono ai le Maota lenei, faipule.

O le mea lea ou te momoli atu le faamalo ma le faafetai ia te outou sa mafai ona auai i le aso ananafi. O lea foi la ou te matauina le toatele ua matua malamalama ae vagana foi latou latou te le o faatauaina le taumafaiga a le tatou Malo ina ia malamalama Tulafono i le talatalanoa lava ma le Loia Sili ma Ofisa Sili o Pulega, o i latou na la e i ai le poto masani ma loloto le iloa o nei mea lavelave tatou te talatalanoa ai. O latou lea o le lima taumatau o le Malo. Ou te faamalo i faipule o lo o faaogaina lenei avanoa tou te malamalama lelei ai i a tatou Tulafono.

**FOFOGA FETALAI:** Malo. Ia, na ona ou fautua atu i le sui usufono mo Salega Sasae. E pei o le ala lena o le taumafai atu o le Nofoa i le faamaopoopoga o a tatou Semina e faamanino ma faamalamalama ai e i latou o e o lo o feagai tonu ma le faatinoga o le Tulafono lenei pe a pasia e pei o Ofisa Sili o Pulega o lo o nafa ma le faatinoga o Tulafono nei. E faapena foi ma Ofisa e pei o le Loia Sili pe a manaomia e faapupula ma faamalamalama i le Semina a le Palemene.

Ae ui i lea, afai o lou finagalo o matou e omai foi lele i i a o oe ia na o oe lava e te sau i le Palemene fua i lou le fia sau i le Semina, ia o se manatu faamaualuga tele lea manatu. Ma ou te lagona ai lava le faanoanoa, ae ui i lea, o le a ou le amanaia. Ae o le mea moni lava, e leai, e le mafaufau lea lafoga. Ioe. E tatau ona e faamalulu mai ona sa i ai sou tuatuagia, aua o le tiute lena o le faipule e sau i le Semina, ina ia manino ma faamalamalama e foia ai le upu lea, lea ua topelau foi lenei Tulafono. Ia silasila i ai? O le mafuaaga la lena o lea e mafua ai ona ou fesoasoani atu, e le faapea ou te au i le Malo, a o le faatinoga o le tatou valaauina e tusa ai ma le Tautoga o le Loto Faamaoni e galue ma le faamaoni i totonu o le Palemene e afua mai i le tatou Semina. Ia, ma lou faaaloalo. O le a ou le manatu tele e faamamafa lou finagalo, ae mamafa i le matau a le tagata.

O le mea la lea, ia malie ia le sui usufono soia e te toe faapena. Tulai mai le sui usufono.

**Tofa OLO FITI AFOA VAAI:** Faafetai. Ou te faamalulu atu lau Afioga i le Fofoga Fetalai ona e le mafai ona matou felafolafoai ma Ofisa Sili o lo o faia le galuega taua lea. E pei la ona ou fai atu i le taimi ua sola, na o i e avatu ai foi nai isi vaivaiga laiti e toe faatupu manatu ai. Ia, a o le tatou galuega ia, leai, o lo o talitonu lava le sui usufono i le tulaga taua o faamalamalama a Ofisa Sili o Pulega i Tulafono taitasi.

Lau Afioga i le Fofoga Fetalai, ia...

**Susuga Hon Tuilaepa Auelua Fatialofa Lupesoliai Lolofietele Neioti Aiono Galumalemana Dr. Sailele:** Lau Afioga i le Fofoga Fetalai, o au e faanoanoa tele lava i le saunoaga a le sui usufono. O le upu lea fai mai e le mafai ona felafolafoai. A le mafai ona fai o lea e fai ai felafolafoaiga i totonu o le fonotaga lea. O lea e fai ai felafolafoaiga, e avatu le fesili aumai le faamalamalamaga. O le uiga lena o le upu, felafolafoai.

O le tulaga lea ou te faanoanoa ai tele, ona o Ofisa Sili nei o Matagaluega, ua matua tuu atoa le latou taimi ona o le ava ma le faaaloalo e leai se nisi o toe aisili, o taitai nei o le atunuu lea ua omai e soalaupule Tulafono e aafia ai o tatou tagata uma, a o lea e vaai maualalo le sui usufono. Ua faafia ona lafo le upu lea, lea, lea e i ai mea ia e nana i le Tulafono, lea e i ai. O a mea o nana? E le o le taimi lea a o a ni mea e le malamalama ai, lea e i ai latou e faamalamalamaina. A o le tele o faitioga, e oo foi i le taimi sa ou galue ai au i le Malo, e valaau atu loa le Komiti, e taatia uma lava matou mataupu ae ou sau, ou sau ou te saofai i luma ae tali mea ia e manao i ai tama o le atunuu in a onapo. O lea la ou te malamalama lelei lava i le taua o le tautua lea e fai e Ofisa Sili o Pulega. E faaavanoa o latou taimi ma le tele o galuega ae omai i luma o le Komiti. O le a le upu lea e masani ona fai? E tusi atu ai lava le Taitaifono ia te au, e le tatau ona... sa tatau ona sau le Ofisa Sili o Pulega e faafeagai ma le Komiti. O le tauloto lena a au ma le Kapeneta e faamanatu ai i Ofisa Sili o Pulega, ia outou omai, o taitai ia o Samoa. Lau Afioga i le Fofoga Fetalai, a o lea e aliali mai e le faatauaina, aemaise lava o oe lea, oe lea, ua fai soo lava lau mataupu lea o lou alu faasalalau ma faamatala sese Tulafono i le atunuu, ae mafua i lou le auai i fonotaga ma e le malamalama ai ma e toe sau e toe tau fesili i totonu i i.

**Tofa OLO FITI AFOA VAAI:** Lau Afioga o le mea e fia faasao, o lea o le a sese ese lava le mataupu lea e saunoa i ai le Palemia.

**Susuga Hon Tuilaepa Auelua Fatialofa Lupesoliai Lolofietele Neioti Aiono Galumalemana Dr. Sailele:** Lau Afioga i le Fofoga Fetalai, o le tulaga lena ua ou tulai atu ai, ona ua fai ma amio a le sui usufono lea...

**Tofa OLO FITI AFOA VAAI:** E manino lava lau faamatalaga o le Sitting lea ou te fai atu matou te le mafai ona matou felafolafoai ma Ofisa Sili o Matagaluega...

**FOFOGA FETALAI:** Malie le sui usufono se i maea le saunoaga a le Palemia ona e saunoa mai lea.

**Tofa OLO FITI AFOA VAAI:** O lea o le a ese ma le Tulafono lea e te...

**Susuga Hon Tuilaepa Auelua Fatialofa Lupesoliai Lolofietele Neioti Aiono Galumalemana Dr. Sailele:** Se se i malamalama ea i le Tulafono Tumau?

**Tofa OLO FITI AFOA VAAI:** Ia aua e te mimiloa solo tala ma le tele o le vevesi.

**FOFOGA FETALAI:** Malie le sui usufono, malie le sui usufono. Leai, onosai mai se i uma ou fai atu lea.

O le faasaoga o le felafolafoai, e sese lou finagalo. E faamalie atu i le sui usufono mamalu. Ua faafia ona tatou Semina ma... A o le a le uiga o le Semina? Tatou te fetufaai, fesili atu tali mai, e faapena. O le a la le mea a tatou lea e fai? O le felafolafoai foi lea e fai i le Palemene. Ae o latou la, o lo o manino lava i le faatinoga ma le afuafua mai o lenei Tulafono, ona aumai foi lea iinei i le Palemene, saunoa faamalamalama foi le Minisita e fitoitonu i ai le Tulafono, ona fia ai lea o faamalamalama? Ia, uma toe talifuaitau i mea sa laga, ua fia ai faamalamalama?

E ala ona mafua ona fai atu le itu lea, malie le sui usufono o le tau faapupulaga aua o lou lava lea finagalo i lau lea finauga. A faasao loa le tulaga, e leai. Ma le isi mea e lagona ai le faanoanoa, o lea lava na ou fai atu, o le a le faamamafa i se manatu, ae afai o le saunoaga lea pei foi lele o lou faipule na tofi na o le Palemene e te sau i ai e aumai i ai lou finagalo, ia o se manatu faamaualuga. Samoa, faamagalalo se upu, ae o se manatu faamaualuga lea manatu. E ui i lea, ou te lagona le loto faamagalalo aua e tataua ona ou faia se fua i lou finagalo lena ua faaalua. Ae ui i lea, na ou fai atu foi, ou te le sailiili masei pe ou te faitau laumata, ae pau o le mea ou te fautua atu, se i outou alolofa, ioe. Afai e te le i auai i le tatou Semina, ia faamama mai le sausu, ae le faapea o le a tuu oe i luga ona fana a lava lea i le tuitui. Ia a fana i le tuitui e te le i i ai ananafi? Ia o ai lea e fai mai e sese? Se i tulai mai e tali mai i lau tala lea e fai atu? O le a le sese o le upu a le Fofoga Fetalai?

**Afioga Hon Aea Peniamina Leavaiseeta (Falealupo):** O au. Ou te tulai atu leaga e sese lea mea lea o lo o faaletonu, o le tulaga lea o lo o fenumiai ai, e le o atoatoa foi le tatou mataupu. O le mea foi la e tau saunoa mai ai le sui usufono mamalu, o mea ia e le o malamalama ai. A o lea ua faamalamalama mai, e faamalulu atu e le o atoatoa lelei. Ae masalo la a faapea na o maua lea e le o malamalama ai, so there must be a reason. Faafetai.

**FOFOGA FETALAI:** Ia, tulai mai le sui usufono e saunoa i le tulaga o le mataupu.

**Tofa OLO FITI AFOA VAAI:** Lau Afioga i le Fofoga Fetalai, ia o le a ou talanoa i le Tulafono. Ia, ou te faamalulu atu foi i lau Afioga i le Fofoga

Fetalai ma le paia o le Maota, e leai e ese lou faaaloalo i le Maota aemaise lau Afioga i le Fofoga Fetalai. Ae taatia ia le femilosaiina o upu ae o le a ou agai tonu i le Tulafono.

Lau Afioga i le Fofoga Fetalai, ia, o lea e matau atu i le Tulafono e foliga mai o se faamama-avega, lea foi ua lavea le tulaga lea i le Koviti lea o faamama-avega i le feagai ai o tatou ma le faamai. O le faamama-avega lea e tulai mai i i i taavale ia e alu i le eletise, na o le 2 tausaga o lo o faia ai le vaega lea. O le fesili lena pe aisea le mea ua na o le 2 tausaga ai. O lona uiga e i ai se pisinisi e aumaia mea ia o lea e faatatau i ai le Tulafono ae le o se Tulafono mo le atunuu atoa. Silasila lau Afioga i le Fofoga Fetalai. Lea ua ave le faamuamua i taavale ia eletise, e le gafatia uma e le atunuu, ae sa i ai le manatu e fai se faamama-avega i tiute ma mea ia, i taavale ma meafaigaluega ma masini e toe atiae ai faatoaga a le atunuu. O le ala lena o lou fesiligia o le vaega lea. O lea ua feagai tatou ma tulaga i faamai. Ua leai ni tatou turisi. Na pau le mea, o le tatou toe foi i i e toe taumafai mai a tatou faatoaga.

O le isi itu lau Afioga i le Fofoga Fetalai, o le tau o... ou te le iloa po o silafia e le Afioga i le Minisita le tau o taavale nei, e faaluaaina, e taugata atu nai lo taavale penisini ia e aumai. A o lea ua faapea mai o se Tulafono e aoga i le atunuu, ou te leai atu i le vaega lea lau Afioga i le Fofoga Fetalai.

O le isi vaega lau Afioga i le Fofoga Fetalai, o le mea lea o le tuu o le discretion po o le faitalia i le Afioga i le Minisita na te fuafua ai tulaga ma le faatinoga o le Tulafono lea i mea tau faamama-avega. O le upu moni lau Afioga i le Fofoga Fetalai, e asa le faiva ae le asa le masalo i mea ia, aua e oo lava foi i mea ia e le faamaoni le faiga, o lea lava e maua i o tatou taliga mea ia o tiute o taavale. O le a le mea e ala ai ona le tuusao le Tulafono i lalo? Tuusao i ai upu o le Tulafono, a faapea e 50% e totogi muamua, togitogi, ona manaia lava lea, ia laugatasia uma le atunuu i se Tulafono se tasi ae le o le faapea fai mai o le mea e finagalo i ai le alii Minisita o le mea lena. E le amiotonu lena vaega i lau tilotilo lau Afioga i le Fofoga Fetalai. O mea foi ia o taavale penisini ia ua saunoa i ai faapea e aumai taavale ia eletise ona o le tulaga o le carbon monoxide po o le saoga lena o le kesi lena. Ia, si tamai mea lava pasene o na mea i totonu o le tatou atunuu. E tele le mau laau, pe asu atu lava le taavale i autafa o le auala, tulou lou gutu ma le afi ma le paia o le Maota, e mimiti uma lava e mautofu ma fuesaina na e i autafa ma mea na, uma. Ae leai lava se mea o le a toe tau fai ai tulaga faapea.

O le isi mea, o le penisini lea e faamoemoe i ai le tatou tamaoaiga i le tatou lafoga. Afai nei la o le faamoemoe o le Malo o le a soloia atu lava mea ma auai mai taavale ia eletise, ia o le a la se mea e toe fesoasoani ia tatou? O le penisini lea e faamoemoe i ai le Malo i le tulaga o tupe maua aua le tamaoaiga o Samoa.

**FOFOGA FETALAI:** Malie le sui usufono se i tulai mai le Palemia.

**Susuga Hon Tuilaepa Auelua Fatialofa Lupesoliai Lolofietele Neioti Aiono Galumalemana Dr. Sailele:** Lau Afioga i le Fofoga Fetalai, e i ai le upu foi lele, e a e le i nofo ma eueu le utupoto i le mata o le isi, ae le i eueu muamua le utupoto i lou mata, e matua leai lava ma se aoga o au faamatalaga na e fai. E faapena le mea lea e tupu i le lalolagi i le taimi lenei. A finau tamai atunuu, e finau i se tulaga e muamua ona fai e latou le faataitaiga. O lona uiga, a e manao e fai se mea, ia muamua fai le faataitaiga. Afai e te manao e te fia malamalama i se Tulafono, fai le faataitaiga ia e auai i le taimi e faamalamalama ai Tulafono, aua o lou sau i i faasalalau ou manatu, o sou vaivaiga na le iloa, ae ua atili ai ona lauiloa e tagata lou vaivai.

Lau Afioga i le Fofoga Fetalai, o le tulaga lea i mea o taavale afi, o lea e faapea e na o tagata maumea, o upu uma lava na sa i ai i le taimi lea ae le i suia taavale afi, na o tagata lava e malolosi e mafai ona latou aumaia ni taavale. A o latou foi na sa matuai teena le Tulafono ina ia alu ai tatou taavale i le itu taumatau, ina ia maua ai e tagata uma le avanoa latou te maua ai ni taavale e mafai ona afford, e mafai ona latou faataua, po o ni taavale e faigofie ona latou maua mai o latou aiga. O manatu foi nei e faatupu ai le tetee. O le a la le mea lea ua tupu? Muamua atu, sa na o tagata e maualuga lo latou tamaoaiga sa mafai ona maua latou taavale afi. A ua a nei ina ua sui le Tulafono? Sa alu ai savali tetee, sa oo mai lava i luma i i savali tetee i le fia afe o tagata e tetee i le mea lea, le suiga o taavale afi. O le a la le mea lea ua i ai nei? O lea ua mafai e tagata vaivai ona maua latou taavale. E faapena foi i le mea lea. O lea foi la ua faasinolinolima le sui usufono aua e sao. A lea sa ou taua atu lava e taugata taavale, a o le suiga o mea o faaiuga fai e taugofie ai ma e afford e o tatou tagata. Aua e mafua ona taugata i le taimi lenei ona e le toatele tagata e mafai ona faatauina ona o le tulaga o le tiute e maualuga tele le tiute. O le mafuaaga foi lena na le aumaia ai, ae i ai lava tagata e lava lo latou tamaoaiga e mafai ai ona faatau taavale ia. Ona a lea? Ona le soona fealuai solo ai lea ma soona faaoga ma faapupusa penisini e palapala ai le tatou siosiomaga, o le sao lena o Samoa.

Lau Afioga i le Fofoga Fetalai, o le tulaga lena. O le mea lea e tulai mai, e te tetee lava faasoloatoa oe ae maua ai foi isi manatu e atili ai ona faamalamalama i e le o malamalama le Tulafono. A ia tatou manatua, o mea foi o tetee lava ia, lea foi sa tetee i le aumaiga i totonu o tatou taavale e o i le itu taumatau, ia lea ua manuia ai le atunuu. E oo lava i o outou itumalo lea tou te omai ai outou ia sa tetee. O le manatu foi e faapea, afai e i ai se feeseeseaiga, e i ai le mafuaaga, ioe, e tataua ona i ai se reason. E i ai le reason. O le isi ituaiga reason, e le fia malamalama e o lo o tetee ona e manao lava latou e faaali o latou taofi. E le o se mea leaga, a o le tulaga lena e atili ai ona iloa le vaivai o le tagata i le le auai i taumafaiga ia e fai atu e le Malo e faamalamalama atili Tulafono.

Ia o le fesoasoani atu lena e toe tali atu i le mataupu a le sui usufono.

**Tofa OLO FITI AFOA VAAI:** Ia o le a faauma atu foi.

**FOFOGA FETALAI:** Malie lau Afioga i le sui usufono mo Salega Sasae se i tulai mai lava le Minisita e ana le Tulafono faamolemole.

**Afioga Hon Tialavea Fea Leniu Tionisio Hunt:** Faafetai lava i lau Afioga i le Fofoga Fetalai. E nofonofu atu lava ae faale-logo lelei le saunoaga a le sui usufono i le uiga faapea e faatopelau le Tulafono. O mea ia o lafoga, e lotea loa lafoga, e matua mataalia le Ofisa o Lafoga aemaise lava lafoga e alu ese, e pei o le 5% lea. Afai o le taavale e \$200,000 ae 5% le tiute, ua misi le matou \$30,000+ i le taavale e tasi, ona e 5% o le \$200,000 e \$10,000 faaopoopo faatasi faatele i le 15% o le GST. Ua misi. Ua misi le \$10,000 o le matou... E le o se tamai tupe le \$10,000, o le \$10,000 aua o le GST e le mafai ona faamagaloa.

O le faapea mai foi o le 2 tausaga pei e fai ona o ni pisinisi o faamoemoe i taavale ia, e talitonu pau lava le vaega na manaomia taavale nei e safflick atoa o le EPC, taavale ia. Ma o le Tulafono foi leni ua leva ona faatino mai. E pei lava ona fai atu, e lotea loa lafoga faaeteete le Ofisa o Lafoga aemaise lafoga e aveese. E faigofie ona aveese, ae matua faigata ona toe tuu i totonu lau Afioga. O le mea lena e lotea aluga le mataupu leni. E lote ma le faaeteete leaga a alu atu e le mafai, e faigofie ona aveese ae faigata ona toe tuu i totonu o le Tulafono o Tiute. E le i faigofie la i le Matagaluega ona aveese le faamama-avega lea, ona aisea? Ua misi lena seleni e aumai e fai ai auala. E faapea foi e le aoga i le tamaoaiga, o taavale nei e faaoga le auaunaga a le EPC, e charge uma ai taavale nei pe a fafaga. O le a la le mea la e faaoga e le EPC? O la e faaoga le power a le EPC e maua ai tupe a le EPC i le fafagaina o taavale nei pe fia taavale e aumai. E le faamoemoe foi le Tulafono lea i ni pisinisi faapea o i ai ni pisinisi faapea e aumai. Na pau lava le vaega lea na tau mai latou taavale, o le EPC.

Lau Afioga i le Fofoga Fetalai, e pei o le popolega lena i saunoaga a le sui usufono, ona e le faigofie ia matou ona aveese tiute. Faafetai.

**FOFOGA FETALAI:** Faafetai. Ia, malie lava le sui usufono mo Salega se i tuu atu le avanoa i Minisita ia e tulai mai, le Minisita mo Fesootaiga, Faamatalaga ma Fesootaiga Vavave Faaneionapo.

**Afioga Hon Afamasaga Lepuiai Rico Tupai (Minisita mo Fesootaiga, Faamatalaga ma Fesootaiga Vavave Faaneionapo):** Lau Afioga i le Fofoga Fetalai, ua ou tulai atu ona o taavale ia o fausaga fou ia i le ituaiga o le tekonoosi. Ou te fia fesoasoani atu i le tau, ona o lea ou te tilotilo i le lisi o taavale ia e faatau i Niu Sila i le taimi leni fuafua i le ituaiga lea e faaoga e tatou o taavale laupasese. A o lea e tilotilo atu, e maua le taavale faatoa 150 kilomita i le \$9,000 Niu Sila. Taavale lau pasese lea e faaoga i le taimi nei. O lona uiga la o le tupe Samoa e nao le \$15,000 Samoa e maua ai le taavale. E le taugata tele lau Afioga e pei o le mea lea e foliga e faapea e na



o e maumea e pei o lea e taugofie taavale nei. O le fesoasoani atu lea e tusa ma le tau o taavale faafetai.

**FOFOGA FETALAI:** Malo, ia a e manao i se taavale ui i le Minisita o la e silafia e le Minisita le mea e maua mai ai taavale taugofie. Ia ae se i tulai mai le isi Minisita o Faatoaga.

**Tofa Hon Lopao Natanielu Mua (Minisita mo Faatoaga ma Faigafaiva):** Faafetai, faafetai lava mo le avanoa i lau Afioga i le Fofoga Fetalai. Leai o lea sa taua le mataupu lea i atinae tau faatoaga, ae o le amataga o le tausaga nei na tatou suia ai le kalifa o le code 121, o lea la ua agavaa ai foi ma atinae tau faatoaga i le faamamaina o le tiute. O le taimi sa i ai muamua e na o le Tourism, ae na ona faamanatu atu i le sui usufono ai ua galo ia ia pe le i fonofono pe a ae faafetai mo le avanoa o la e i ai le suiga lena i le Tulafono mo Faatoaga ma le faaaloalo.

**FOFOGA FETALAI:** Ia, malo, tulai mai le Sui o Salega.

**Tofa OLO FITI AFOA VAAI:** Faafetai i le Afioga i le Fofoga Fetalai, leai o si mea la... leai o taavale sa ou talanoa ai i le Ofisa o Faatoaga, le aufaifaatoaga ona o le Tulafono, o lea e na o taavale foi ia e alu i le eletise, hybrid vehicles. Ae e le o lavea ai... e na o se talosaga pe le lavea ai ma taavale ia mo le aufaifaatoaga.

O le tulaga foi la lea na saunoa i ai le Minisita i le mea ia o penisini, pe charge i le power a le EPC, ia ituaiga fou ia o hybrids ia, e toe charge lava e solar i luga o taavale o lona uiga e le manaomia se paoa a le EPC.

**Afioga Hon Tialavea Fea Leniu Tionisio Hunt:** Lau Afioga...

**FOFOGA FETALAI:** Tulai mai le Afioga i le Minisita, e le i ai i le semina ananafi ae o lea e malamalama lava ia.

**Afioga Hon Tialavea Fea Leniu Tionisio Hunt:** O la e tali lava e ia lau Afioga. Ae o le faasaoga o taavale o la ua i totonu o le kalifa lea 201 e lavea ai foi ma taavale. E oo foi i mo mea o excavator te i ua e... ua mafai ona aumai i totonu excavator a le aufaifaatoaga duty free, i le taimi lenei i le Tulafono lea na sui nei. Ua mafai ona aumai, te i ua galo ia oe ae ua mafai ona aumai. E oo foi i loli, loli ia e feoai solo mai i i ua mafai ona.. ua i lalo o le Ofisa o Faatoaga. Ana e fonofono soo la atonu e te malamalama i le fesuaiga lea e i ai, o le tele o le faamama avega lea ua avatu i le mamalu o le atunuu aemaise lava i faifaatoaga. Ia a foi o faatoaga laiti e le totogiina ia ni latou lafoga, seivagana ia le au commercial. Matua tele lava o le fesoasoani, ia faafetai.

**FOFOGA FETALAI:** Malo, faafetai.

**Tofa OLO FITI AFOA VAAI:** Ia, o le a le faafinauina lea mataupu. E pei e le o malamalama le Minisita i le Tulafono lea e aumai.

Ae lau Afioga i le Fofoga Fetalai, na pau lava le fesili na ou fesili ai, aisea...

**Afioga Hon Tialavea Fea Leniu Tionisio Hunt:** Ua le mafaufau tala ia.

**Tofa OLO FITI AFOA VAAI:** Ua 2 tausaga e faatino ai le Tulafono lea?

**FOFOGA FETALAI:** Malie le sui usufono, se i toe tulai mai le Minisita leaga..Se soia e te lima i maa Olo.

**Afioga Hon Tialavea Fea Leniu Tionisio Hunt:** E le mafaufau faamatalaga lea ou te le o malamalama i le Tulafono. Toe faafoi upu ia. O ia la e le o malamalama pe le fia malamalama po o le le malamalama foi.

**FOFOGA FETALAI:** Ia malie lau Afioga, o le upu foi o lape o lauga, lape o saunoaga. Alofa ia e aua le toe tauina lea upu faapea.

**Tofa OLO FITI AFOA VAAI:** Faamalie atu foi i lau Afioga i le Minisita, vaai o la e saunoa mai lava le Palemia ou te vaivai ou te le taitai ona ou tali i ai. Ia e faapena ona fai ia le tatou taaloga ae aua... se onosai.

**Susuga Hon Tuilaepa Auelua Fatialofa Lupesoliai Lolofietele Neioti Aiono Galumalemana Dr Sailele Malielegaoi:** Lau Afioga i le Fofoga Fetalai ou te le i fai atu e vaivai Olo. Na ou fai atu o le le auai ma sau i i e pisapisao ai e atagia ai le vaivai o le sui usufono. Ae ou te le i fai atu e vaivai Olo. Leaga ana faapea e malosi e tataua ona fai le mea lea ou te fai atu ai.

Lau Afioga i le Fofoga Fetalai, e lelei ona nofo silafia, o le mea e pito i sili ona faataua atu i le ioega a le Kapeneta i i, o le sao o le tulaga lautele o le tuuitiitia o le faaaogaina o le penisini. O le tatou sao lea e tuuitiitia ai le aafia o le siosiomaga.

O mataupu ia e tuu i totonu o tatou lipoti e ave i Malo Afaatasi e faailoa i ai ia gaioga ia e fai e Samoa. E na o le pau lava lena o le mea e leai lava se isi auala. Ana le faapea e le tele lona sao i le tatou siosiomaga, i totonu o lo tatou sao, o le atunuu o Samoa e tuufaatasi ma atunuu o le Pasefika e leai se mea e faia. O le tulaga sao lava lena. E le ioe i le ituaiga taavale lena. Ae o le mea foi lea ua tulai mai, o lea ua agai i ai le lalolagi i le ituaiga taavale lena.

O le faaaoga o le tusi, ua agai uma lava i ai le lalolagi. E tatou e manatu mama la i ai, aemaise latou ia e le malamalama, o lea ua tatou laa i totonu, o le gaioga lautele lea ua fai e atunuu o le lalolagi. E i ai isi ituaiga faiga la ua agai i ai manatu ua leva ona agai i ai manatu i le mea lea o le solar. O la

e oo mai nei sa i ai manatunatuga o isi, e na ona aumai lava o si au tamai solar si tamai mea foi lea e pue ai le la, e na o le faapea lava le umi, ae faapea le lautele, tuu lea i luga o le taavale. Ia ona feed mai lea fafaga mai i le maa. E oo mai nei e le i faia lava lene mea.

Ae o le mafuaaga lene, na ala ai ona ou fautuaina le Kapeneta, i le isi kamupani na omai ma talanoa mai o le mea lene o le a agai i ai, ona sa ou vaai i ai i le lala o le kamupani na ou vaai i ai, i le fonotaga sa fai i Arapi na faalauiloa mai ai le tekonolosi lea. Ia ua leva ona ou moemiti i ai ia tupu, ae oo mai nei e le i tupu lava le mea lea.

O lona uiga, o lea la ua faalava mai i i le eletise e mafai ona alu ai loa taavale, ae mulimuli ane, masalo o le tulaga lene, a **perfect** loa le technology lene, ia ua leai la se isi suiga tele e toe manaomia. Ia aua na ona sosoo mai lava i le battery, ia ona alu ai loa i le eletise e sau mai i le la. E le i tupu lava la ou te le i vaai lava i se atunuu o faia le mea lea.

Ma o mataupu ia o lea e fono ai ia mea nei o faalapotopotoga a Taitai o Malo. E le gata i le Pasefika lenei faapea foi feiloaiga nei e tai 2 tai 3 tausaga e fai ma le Malo o Iapani. O i ina lea e tele ia le latou research, lea e fai ituaiga auala eseese e faasaoina ai le suauu. Pe a manatua e lo tatou Maota, le taape mai o le matou fonotaga a Taitai o le Pasefika, lea sa usuia i Tuvalu, ae vevesi ia faasalalauga sa fai, ona o finagalo na faaalia i le tulaga na faatu atu e Ausetalia, i le toe faaaogaina o latou koale. Na matua tetee uma ai ia le tele o sui o le Pasefika.

Lau Afioga i le Fofoga Fetalai, o mataupu loloto ia, lea e faavae ai ia, ona o lea e auai Minisita uma o le Kapeneta i fonotaga ia faavaomalo, faapena foi ma Faauluuluga o Matagaluega ma latou silafia ai, ia suiga tetele nei ua fou mai, ina ia aua ne i tuai tele tatou. Ae ia taunuu mai loa, a ua fai foi ia ma tatou tapenaga.

Ia lau Afioga i le Fofoga Fetalai, ia o le toe fesoasoani atu lene i le mataupu lenei.

**FOFOGA FETALAI:** Malo, tulai mai lau Afioga i le sui usufono mamalu e faauma mai lau saunoaga.

**Tofa OLO FITI AFOA VAAI:** Lau Afioga i le Fofoga Fetalai, ia lea ua faauma atu. Lau Afioga na ala ona mafua ona tau masalomia ia le tulaga, ona e na o le 2 tausaga lea e tuu mai ai le faaaogaina ai le Tulafono lea. Ae e leai lava ma se isi e na te mafai ona...

**Susuga Hon Tuilaepa Auelua Fatialofa Lupesoliai Lolofietele Neioti Aiono Galumalemana Dr Sailele Malielegaoui:** Lau Afioga...

**FOFOGA FETALAI:** Se i tulai atu le Palemia...

**Susuga Hon Tuilaepa Auelua Fatialofa Lupesoliai Lolofietele Neioti Aiono Galumalemana Dr Sailele Malielegaoi:** O lea e mataitu le Malo, o lea e mataitu. 2 tausaga e mataitu ai, ia le tulaga o le faagasologa. E faigofie lava. O le ala foi lena e le tali atu le Minisita ma ou le tali atu, na ou manatu, o mea na e le tau fesili ai se sui usufono ua silia ma le 3 Nofoaiga i totonu o le Palemene lenei. O mea faigofie.

**FOFOGA FETALAI:** Malo, ia tulai le...

**Tofa OLO FITI AFOA VAAI:** Lau Afioga i le Fofoga Fetalai, a lea na saunoa le Minisita o Fesootaiga, \$17,000 ea pe \$11,000 le tau o le.... e leai ma se isi o le atunuu o matou i Savaii ma tua e na te maua se tau o le taavale lea i totonu o le 2 tausaga, e maua atu ua toe uma le Tulafono.

**Susuga Hon Tuilaepa Auelua Fatialofa Lupesoliai Lolofietele Neioti Aiono Galumalemana Dr Sailele Malielegaoi:** Lau Afioga i le Fofoga Fetalai...

**FOFOGA FETALAI:** Ia se i tulai mai le Palemia.

**Susuga Hon Tuilaepa Auelua Fatialofa Lupesoliai Lolofietele Neioti Aiono Galumalemana Dr Sailele Malielegaoi:** a lea sa ou avatuina ia le faaitaiga. Ao le i faia ia suiga o tatou Tulafono i taavale afi e sui ia le itu e o ai, e leai ni tagata e toatele sa mafai ona maua ni taavale. E matua leai lava. O le tele o aiga e le mafai. Ia ona tetee lea. Ae o le a la le mea lea ua i ai? Ua uma suiga, ma ua amata ona faagaioi, ia ona maua ai lea e le toatele. O isi aiga ua tailua taitolu taavale.

Lau Afioga i le Fofoga Fetalai, masalo e leiloa e le sui usufono aua e le alu soo i Savaii.

**FOFOGA FETALAI:** Ia...

**Afioga Hon Afamasaga Lepuiai Rico Tupai:** Lau Afioga...

**FOFOGA FETALAI:** Se i tulai mai le Minisita o Fesootaiga Televavave.

**Afioga Hon Afamasaga Lepuiai Rico Tupai:** Na ala la ona tau atu le tau o le taavale lau pasese, o le tau o le taavale lau pasese la e i tai i Apia, e \$17,000 i le \$20,000. O lona uiga la o lea e taugofie atu le taavale lea alu i le eletise pe a oo na faatau e lau ai ia tatou pasese na i lo taavale la e faatau i tai, lea e faatau e o tatou aiga i Savaii ma tua, faafetai.

**FOFOGA FETALAI:** Ia, tulai mai le sui usufono.

**Tofa OLO FITI AFOA VAAI:** Lau Afioga i le Fofoga Fetalai, ia ua uma se manatu. E pau lava le mea ou te alofa ai, o lea faatoa tau amata au pamu penisini ae o lona uiga e toe tapuni uma lava ae faaoga taavale eletise a le aualii ia.

Ia o se manatu na lau Afioga i le Fofoga Fetalai, ae faafetai tele lava mo le avanoa ua le sao se tala e na o le fai ma tulai mai. Ia manuia le Fono.

**FOFOGA FETALAI:** E mafua ona e mafatia, o le leai o sau tupe, ae o la e i ai le Federal Pacific a Namulauulu e te agai i ai. Ia malo faafetai. Ia e faapena se le manaia o le Fono e faafofoga mai Samoa e fai totoe ae e le o le fai tauaimisa.

**Tofa LEALAILEPULE RIMONI AIAFI:** Lau Afioga i le....

**FOFOGA FETALAI:** Tulai mai le... o lea sa matou faatasi ai ma le sui usufono o Faleata, ia ua ou iloa e le umi se... tulai mai e saunoa.

**Tofa LEALAILEPULE RIMONI AIAFI:** Lau Afioga... faafetai lava mo le avanoa. A foi sa aumai lau faanoi, ia ae e le afaina. E taua le Tulafono, e le o se taimi muamua foi lea sa laga ai e ni sui usufono le vaai a le Malo i le vaega lenei. O lea la ua aumai ia le aotelega, e talitonu o la e misi i nisi o sui usufono ia le aotelega o le Tulafono, fesoasoani mo le tatou taumafaiga o le Pasefika atoa i le fesuaiga o le tau lea e aafia ai tatou.

Ae o le mea la lea e fesili ai i le Afioga i le Minisita, aua o lea ua fai lau galuega fesoasoani, ae a aumai taavale iinei, o le uiga o lau faamatalaga, e le tasi se itutino o le Malo e faia se faaiuga faapea ona mafai ai lea e tagata uma ona aumai. E tatau ona galulue ma isi itutino o le Malo, ona faatoa mafai lea ona faigofie ma augofie ia finagalo o tagata e aumai ia suiga tele lea.

Manatua foi, o lau fesili i le Afioga i le Minisita, o le a se suesuega i le taimi nei? O le tau o le lita penisini lea e i ai nei ma le kiso, e \$2 ma ona tupu. Ia ae o le tau o le mea lea o le paoa lea e i ai nei, pe \$0.50 agai i le \$0.60 i le iunite lea e i ai nei. Po o le a le mamao e faaoga ai e taavale nei ia le paoa consumption lea e talanoa i ai. Ne i te i leaga e aumai, ae aumai, e taugata aua e taugata laitiiti le iunite lea o le paoa.

O le isi mea, o le taimi nei, o lea e pay le levy foi lea e taavale uma lea e faaoga le auala. Taavale ia e faaoga penisini. Pe pay pe faafefea la ona fai le... aua e tatau ona totogi tupe nei a taavale ia e feoai i le auala, aua e aumai faaoga auala. Po o faafefea la ona aumai se latou fesoasoani i totonu o tupe a le Malo i le LTA i le faaogaina o mea nei.

O le isi vaega lau Afioga o lea e taua mai e Malo tetele ia o Europa, Peretania, 2040 po o le 2050 e taunuu atu i le taimi lena ua o uma le tele o taavale mo taavale i le ituaiga mea lea. O lona uiga, e agai i luma i le isi a tatou filifiliga saoloto e fai e tatou, ae o le a faamalosi tatou i le ituaiga

suiga lea. Ia aua o le a agai foi ia kamupani faitaavale e fau taavale nei, ae faatuatuanai taavale ia e faaaoga ai le isi malosiaga lea.

O le luitau lea e i ai i mea nei, o atunuu foi ia e latou te gaosia suauu ma le kiso. E pei o latou ia e tele ina taofiofiina ma tanumia taumafaiga e encourage e faamalosia ia le faiga o taavale nei. Ae o nai fesili na i lau Afioga i le Minisita, ia e fia maua ai sina malamalama laitiiti afai foi e leai, ia ona aumai lea o sau tusi. Ia ma le faaaloalo lava, faafetai.

**FOFOGA FETALAI:** Malo, faafetai. Ia manatua foi le sui usufono mamalu e alu le Tulafono lenei i le Komiti. E iloilo ai ia ma toe lipoti mai, tele o na avanoa e toe maua foi, ia ae... pe a faapea e faapena. Ia ua ou iloa ua leai se isi sui usufono e fia saunoa i ai. Ia tulai mai lau Afioga i le Minisita e saunoa e tali i nai mea ua... aua o lea lava e tulai mai ia fesili ma tali, atonu lava...

**Afioga Hon TIALAVEA FEA LENIU TIONISIO HUNT:** Faafetai lava i lau Afioga i le Fofoga Fetalai, faafetai foi i sui usufono sa laga ni manatu i le Tulafono.

Ia o le sui usufono faatoa mavae atu nei, e talitonu o le levy lea e taua atonu o le a faaaoga mai le EPC, ona e faaaoga e latou le paoa ma le penisini e faaaoga e mumu ai le afi e mafai ai ona utu. Ao isi uma aiaiga lea e te atugalu i ai e tusa ai ma le tele o le tupe alu i le penisini ma le tele o le tupe alu i le charge ina o taavale nei, ia o le a avatu se tusi i o i le Komiti ona e agai lea i ai e te malamalama lelei i ai lau Afioga. Faafetai lava.

**FOFOGA FETALAI:** Ia, malo. Vaai i lena galuega lelei e fesoasoani i sui usufono o lo o faapena ona fia maua si o latou malamalamaaga. Fesoasoani foi, a o fea tonu le mea e maua mai ai taavale.

*Na faamaonia le lafo ma faitauina le Tulafono Tau Faaofi o Teuteuga o le Tulafono o le Faasologa o Tiute 2020 i lona faitauga faalua.*

**FOFOGA FETALAI:** E tusa ai ma Tulafono Tumau o le a tuuina atu le Tulafono Tau Faaofi o Teuteuga o le Tulafono o le Faasologa o Tiute 2020 i le Komiti o le Vaega tau le Tamaoaiga mo le iloilo ina ma toe lipoti mai i le Fono Aoao i se Fonotaga o lumanai.

## **TULAFONO TAU FAAOFI O LE ULUFALE MAI O TAGATA 2020 – faitauga faalua**

**FOFOGA FETALAI:** Tulai mai lau Afioga i le Taitai o le Maota.

**Susuga Hon TUILAEP AUELUA FATIALOFA LUPESOLIAI LOLOFIETELE NEIOTI AIONO GALUMALEMANA Dr. SAILELE MALIELEGAOI:** Lau Afioga i le Fofoga Fetalai, ou te faatu le lafo, *Ina ia faitauina nei le Tulafono Tau Faaofi o le Ulufale mai o Tagata 2020 i lona faitauga faalua ma ou te fia tautala faamalamalama i ai.*

*Faalua e le Minisita mo Pisinisi, Alamanuia ma Leipa ma le Minisita mo Tina ma Tamaitai, Atinae o Nuu, Afioga ma Agafesootai.*

**FOFOGA FETALAI:** Ia, ua avanoa le Palemene mo le saunoaga faamalamalama a lau Afioga i le Taitai o le Maota mo le Tulafono e fitoitonu ma lau Afioga.

**Susuga Hon TUILAEP AUELUA FATIALOFA LUPESOLIAI LOLOFIETELE NEIOTI AIONO GALUMALEMANA Dr. SAILELE MALIELEGAOI:** Lau Afioga i le Fofoga Fetalai, o lenei Tulafono Tau Faaofi, o le a soloia ai le Tulafono o le ulufale mai o tagata na pasia i le 2004, lea o lo o faafoe ai nei ia tatou gaoiga mo le ulufale mai o tagata. Ma ua suia nei i se faatulagana ua tuu lata mai ma fetuunai mo mataupu tau i le ulufale mai o tagata.

O lenei Tulafono Tau Faaofi, o le taunuuga lea o galuega tau iloiloga ma faatautaia faatasi ma le lagolago mai a le faalapotopotoga a atunuu o le Pasefika mo le atinae o mataupu tau i le ulufale mai o tagata i le Tulafono o le 2018. O le taua o le itu lea, ona e oo loa i mea tau Tulafono o Femalagaiga, e tatau ona i ai se tau faalaugatasia o Tulafono o Malo nei o le Pasefika. O le taimi lenei ma le matautia o soligatulafono ia e fai nei e faigofie femalagaiga a tagata solitulafono faavaomalo. E ao ai ona galulue faatasi ia tatou Ofisa uma i le tulaga o le puipuiga o le tatou atunuu mai ia i latou e solitulafono, e soona ulufale mai i lo tatou atunuu aemaise i latou o atunuu tu lalata mai i lo tatou atunuu.

O lo o aiaia i le Tulafono Tau Faaofi fou, se faatulagaga tulata mai e faapea ona tausia ai faiga faataatitia faavaomalo, mo le faagasologa loa tau i le ulufale mai o tagata eseese. Ae ua faapena foi ona aiaia ai e pei o se faiga faavae e tuuina atu ai puipuiga o tatou tuaoi.

Pe a matau mai lau Afioga, o le 2004 na faapasia ai le Tulafono, 14, 20, 16 nei tausaga talu ona faagasolo. Ma e talu mai na taimi e tau mai i le taimi lenei, tele lava mau soligatulafono ua tulai mai, e ao ai ona toe teuteu ia tatou Tulafono. O le mea moni lau Afioga i le Fofoga Fetalai, e leai se Teuteuga o se Tulafono e fai e se Malo ina ia malaia ai. E na o Teuteuga e siitia ai le manuia o se atunuu ma le puipuiga o ona tagata. Ma o le tiute lea o so o se Malo o lo o tu i le foe. E latou te mataitu le faasologa o Tulafono ma le faatinoga. E latou te mataitu foi mea o lo o tutupu i le lalolagi, ia faapea foi ia o tatou va tuaoi, ina ogatasi ia mea tatou te faia, ma puipuiga foi o lo o faia e isi atunuu o le lalolagi.

Ae tatou te matua faaeteete foi, ona e i ai foi taimi e le ogatasi ai faiga a isi atunuu ma tatou foi. A tau tomanatu i nai tausaga ua tuanai, lea na tagatavaleina ai le toatele o latou sa nofo tatalo fai le latou faigalotu, ae alu atu ia se tagata faatupu faalavelave ma faaoo le oti i ai latou e toatele. Ia, ae afua mai i ni suiga televavave o atinae ua i ai le lalolagi.

O mea ia o atinae o fesootaiga televavave, ua faatupu ae ai ma le feinoinoai, felotoleagaai ma le fetuiai i ai latou leai ni foliga, lafi i tua mo mea o fesootaiga e le tusia ai ia o latou igoa. O lea foi la ua aafia ai ma Samoa. Ae atagia ai, le tetee o i latou sa taofiofi. Sa taofiofi a o i lalo o pulega faamatai. Ma o atu loa i fafo ua maua le saolotoga, ona o faiga faavae a lo tatou Malo, sa manatu le Malo e maua ai lo latou soifua lelei i atunuu i fafo, e atiae ai aiga, maua ai galuega, maua ai so latou lumanai fou. Ae ua maua auala latou faatino ai lo latou loto faatupu vevesi, faasaga i pulega ia e faatino i Samoa nei.

Mo atinae ia fesootaiga faa-televavave, lea ua faatupu vevesi nei i le lalolagi i le taimi lenei. Ma ua matauina ua fesui ai mafauauga o Taitai o Malo. I i tua atu o le faalavelave lea na tupu i Niu Sila, e pei sa le mamafi tele i Malo ia e 2 o Ausetalia ia ma Niu Sila ia tulaga ia ona o tua atu o le saolotoga lea, o lo o i ai saolotoga faavae e pepese ai lava latou ia mai fafo, aiatatau. Aiatatau e faaali saoloto ai o latou mafauauga, aiatatau faamalepe Malo, faamalepe atunuu faamalepe aiga. O lea la na faatino i i, ua suia atoa ai le lotolelei i le loto-le-lelei, ia faauma loa soifua o aiga, fanau pele.

O le a la le mea lea ua tupu ia Niu Sila ma Ausetalia? O lea ua suia ia latou Tulafono e puipuia ai ia o latou tagata mai tagata faatupu vevesi faapenei. Ua ou taua lea tulaga lau Afioga, ona i le faagasologa o le tatou soifua, e i ai mea e tutupu. E i ai mea e tutupu e tatau ona tatou liolio i ai, a silasila loa i le mea e tatau ona fai fai loa. Ae e le o le nofonofo, i luga o le faamalu, sui soo, sui soo. O le ala lena o lea e fua ai ia Tulafono ia e 3, e teuteu ai ia lo tatou Faavae. Mo le puipuga o le Pule mamalu a Alii ma Faipule.

Lau Afioga i le Fofoga Fetalai, ua ala la ona ou taua le itu lea, ona e leai se Malofaavalevlea, e nofo nofo lava fai ana Tulafono, toe aafia ai o tatou tagata, aemaise o mataupu tau eleele ma suafa. E toe aafia ai le Maota lea, lea faatoa Samoa le Maota lenei o le Palemene. Lea faatoa 100% Alii ma Faipule o matai, lea ua saofafai i totonu o le Palemene lenei. O le a lo tatou tiute? Faamatai, o le fai o Tulafono e puipuia ai o tatou tagata, o tatou eleele, o tatou aiatatau e puipuia ai o tatou aiga. Ma e leai se matai o i totonu i i, e na te ioeina se Tulafono, e faataape ai meatotino a lona aiga, ao ia o le sao o le aiga. Ailoga e i ai se matai e faapena? O lea e saofai i totonu o le Maota lenei?

E na te faatauaina lana tu ma lana agaifanua, le Pulega mamalu a Alii ma Faipule, na mafua ai ona tatou taunuu mai i nei tausaga, fai mai isi e 3,000 pe 4,000 ia e mafai ai ona agai i tua ma maua ia faamaoniga o le atunuu lenei o Samoa, na nofoia i le 3, 4 i le 5,000 tausaga talu ai. Pulega mamalu na a



Alii ma Faipule, na puipui malu ai ia o tatou tagata se i tau mai i le taimi lenei.

Lau Afioga i le Fofoga Fetalai, e faapena suiga lea e fai i le Tulafono lenei. Ua o tatou vaavaai, e i ai ia mea ia e tataua ona teuteu, e puipuia ai ia lo tatou atunuu mai i le ono ulufale mai o i latou e ono aafia ai le puipuiga o Samoa. Ma o Teuteuga uma lava o lea e i totonu i i, lau Afioga i le Fofoga Fetalai, o lea ua suia ai ia le Tulafono lea sa taoto mai i le 2004 se i tau mai i le taimi lenei, toe teuteu atoa ona o lea ua vaai le Malo e tataua ona toe teuteu le Tulafono.

O le suiga foi o lea e fai e le Malo lenei ia le tatou Faavae, fai ma teuteu le Faavae, lea e manino i ai latou tama o le Faavae. Ua latou faia ia mea sa mafai ona fai i lo latou taimi. Ae tuu mai i le lumanai, ma augatupulaga e tulai mai i lenei taimi, o tatou ia, e teuteu e tatou e tusa ai, o mea ua tatou talitonu e tataua ona fai. Ae o isi talitonuga na o le Afioga a le Atua, *'o le na te iloa le mea e tataua ona fai ae le faia, o le agasala lenei i luma o le Atua'*.

Lau Afioga i le Fofoga Fetalai, o le faapuupuuga atoa lenei o le Tulafono lenei, ua faataoto mai e ave i o i le tatou Komiti, e tusa pe alu se fia tausaga o i ai i le Komiti latou te tilotilo i ai ma maua ai foi le avanoa o outou o sui usufono e mafai ona fai ai ni a outou molimau, ua outou silafia e tataua.

Lau Afioga i le Fofoga Fetalai, o le faamalamalamaga lenei.

**FOFOGA FETALAI:** Malo, faafetai. Ua manino ia itu uma, e pei ona saunoa ma faapupula e le Taitai o le Malo, ua avea foi ma maa faaafuagalu lenei Tulafono, e faapena ona toe matimati ai mai le fia sefulu tausaga ua tuanai. O se aoga tele lea mo i tatou i suiga ua i ai foi lenei vaitau. Aua tatou te amatamea le Malo i suiga lelei talafeagai mo le tatou soifuaga aemaise le tatou siosiomaga. O le mea lea, o le Tulafono foi e see atu i le Komiti ona faapena lea ona maua avanoa o sui usufono e toe faamalamalamama atili ai lenei Tulafono. O le mea lea, ua ou manatu e tuu atu ia le fesili, ailoga o a ni manatu e toe fia laga o lea e see i o i le tulaga o le Komiti.

O le mea la lea, malo faafetai i o outou finagalo, e tele avanoa.

Malie le sui usufono mo Falealii Sasae lau Afioga i le Fuimaono, se i tuu atu le avanoa i le Palemia, se i faatu mai se lafo, ona o lea ua oo i le taimi manava. Ina ne i e saunoa lava oe ia, ae matou taape matou.

## **LAFO MO LE FAAAUAUINA O ITULA FONO MA LE TOLOPOINA**

**Susuga Hon TUILAEP AUELUA FATIALOFA LUPESOLIAI LOLOFIETELE NEIOTI AIONO GALUMALEMANA Dr. SAILELE MALIELEGAOI:** Lau Afioga ma le mamalu o le Maota nei, ona o lo o tele nisi o galuega e fia faamaea. E le gata i le mamalu o le Kapeneta ae faapea foi nisi o Komiti faa-Palemene. Ou te faatu ai le lafo, *Ina ia faamaea*

*ma faitau faatolu nisi o tatou Tulafono Tau Faaofi o lo o i le Pepa o Galuega, ona tolopo ai lea o Taulumaga o le tatou Fono Aoa, seia aulia le aso 6 Oketopa 2020.*

*Faaluaina e le Minisita mo Pisinisi, Alamanuia ma Leipa.*

*Na faamaonia le lafo.*

**FOFOGA FETALAI:** E i ai se i tulai mai, o le ala la ia o mea, ae semeamanu e te saunoa ae matou taape matou.

**Afioga FUIMAONO TEO SAMUELU TEO (Falealili Sasae):** Ioe, sa tau avatu le talosaga, a faauma lava le Fono, ona faaola pea lea o mea faaleotele leo i le leitio ma le TV, ona fai ai lava lea o lou manatu ae taape le tatou Fono. Ae malo faafetai.

O le tulaga i le Tulafono e taua, e leai lava se vaega o le Tulafono e le taua. Ae ua ala ona tulai atu, o se toe faamanatu, ia faataua le tulaga lea, o le Vaega 29 o le Tulafono. O le Vaega 29 o le Tulafono lea e faapea mai ai, o le tuuina atu o visa ia i latou e ulufale mai. E le na ma le laina foi le tatou matau, ua toatele nai tagata foi ia mai fafo lea ua faigaluega iinei. O lau tilotilo i ai ma lau matau, o le vaivai ia o le tatou monitoring system. Tulaga ia i latou ua ave i ai le faatagaga i visa e tafafao mai ai. Ae peitai e taunuu mai iinei, o lea ua tatou vaai. E oo lava i le galuega e mafai ona fai e le tagata Samoa, o lea ua fai e le tagata Asia po o le tagata mai fafo. Galuega foi ia o non skills employee, o lea ua tu i le kesia ua avetaavale ua leoleo po, ua kiligi, ua teu oloa, tulaga faapena, e oo lava i le tausima. A o le mataga ia o le faaupuga foi lele, a fai atu ae fai mai, e ala ona aumai le tausima mai fafo ona o le faamaoni o tagata Samoa. A o le uiga o le faamatalaga e tau tuualalo, ina ia faaavanoa avanoa faigaluega mo tatou tagata.

Aua o le upu moni lava, sei vagana o lea ou te tau matau o le Tulafono seiloga ua i ai se potu faapitoa ua le maua i Samoa, po o le tulaga o galuega e toaititi i latou e i ai, ona faaoga mai lea o i latou mai fafo. Peitai o lau matau, o le tele ia o galuega e mafai ona fai e o tatou tagata, e tuu i ai le avanoa. A o lea ua oo lava i nai galuega faigofie na, o lea ua fao uma e i latou...aemaise lava mea nei o faleoloa, supermakets, wholesales tulaga o pisinisi faapena, ae le tuu le avanoa. O lea la e avatu ai le fautuaga ia i latou o lo o vaavaaia le vaega lea, ina ia mataitu lelei. Po o latou ia na o mai e tafafao ae ua ave ma tagata faigaluega, e oo lava i le vaega lea e o e ave le kiliva i tua, ua soo se kiliva eseese. E te vaai atu lava e ese tagata ia e o atu ai. O le ala lena o lou tulai, ina ia faataua avanoa faigaluega mo o tatou tagata. Ma le agaga faaloalo.

**FOFOGA FETALAI:** Malo, se i tulai mai le Palemia.

**Susuga Hon TUILAEP AUELUA FATIALOFA LUPESOLIAI LOLOFIETELE NEIOTI AIONO GALUMALEMANA Dr. SAILELE MALIELEGAOI:**

Lau Afioga i le Fofoga Fetalai, o mataupu ia e masani foi ona ou talatalanoa ai, e le gata i officials a e faapena foi ia i latou e ana pisinisi nei. Ma o nisi foi o i latou e faia mea ia ua sitiseni Samoa. Ua nonofo i teine Samoa, ua Samoa, e toatele foi o tatou tagata o la e galulue ai. Ma iu lava ina ou alu ou vaai tino i ai, ona e tasi lea anava i le mea lea e le mafai ona e talitonu i se faamatalaga seiloga e te vaai i ai. Ou te alu ou vaai i ai, e faamaonia ai le toatele o Samoa o la e galulue ai, ou te iloa uma ai faamatalaga na. Ae aumai lava ma le ata, faatitilo oe i le mea lea. Ou te iloa o le tele o mea ia e le o silafia e le toatele o tatou tagata, ua camera loaloa totonu. E faaali mai lava e camera ua fafao e le isi i lana ato ia mea ma nana, ae fiu e faasufi, e leai lava. O le iuga lena ona dismiss lea, o le tulaga lena aua o tatou faasalalaua ia, o tatou talanoaga ia e fai e faasalalau faalauaitete. O le tele ia o uiga ia e faaalua pea, e le natia aua e i ai mafuaaga. O le mafuaaga o le tele lava o tatou tu lava ma aga. O le faamatua, o le uunai o fanau e manaomia se \$1,000 nei, lea vaiaso manaomia se \$2,000, e ave e fai ai le taulaga, ave e fai ai le faaipoipoga ave e fai ai le oti, o mea e mafai ona fai i le \$100 ae manao i le \$2,000.

O le ala lena ua tele ai talosaga ua aumai i le Kapeneta. Se faaauu pea le Koviti lea seia oo lava i le faavavau. Ua tele le mafatia o aiga i mea nei, aemaise le fanau i fafo. E le tanua a latou oti i tulaga masani, o nisi e atoia le masina o faatalitali le fanau i fafo e o mai ma ni tupe e fai ai. A o la e tau sue ni.... e tau faaputupu a latou tupe e o mai ai. A o le taimi lena, ua maua le toomaga, ona ua le mafai ona feoai vaalele, aemaise foi ua le mafai ona maua ni galuega. Ae pei o le Koviti lena ua sau, e pei o le isi lea taeao fou, e toe mafai ai ona toe tilotilo i tatou. O Tafaigata e toatele ia o latou talavaou, aaoaina lelei, ua avatu i uta ona o le mea lea o le lima tagoese ona o faalavelave, e uunai e matua fanau, e o e avatu ni tupe, avatu ni tupe.

O ananafi na oo atu ai le isi tina, e 3 aso o alu atu ia te au. Ae faamatala atu, se i ou fesoasoani i le loan a lana tama, e fia fai i le NPF, ona ou talatalanoa lava lea i ai. Tau mai le tele o le totogi ia, o le totogi e tele, ae toese toese lava aitalafu, ua aitalafu uma lava i le tele o mea, e oo lava i le NPF. Ae sau, o le laititi ia o le mea la e totoe e ola ai, ae o lea e toe manao i le isi loan e tele, e faitau afe ma afe. O lau tala na fai i le tina, vaai, o le le amiotonu lou fesoasoani atu ia te oe e fai lau loan. E le gafatia e lau tama, o lea ou te vaai atu o le Ofisa Sinia o le isi Matagaluega a le Malo, faaoga lou mafaufau. Ia faaoga lou mafaufau, o mea ia e fanau mai ai le amio le tonu, le le amiotonu i le faatinoga o galuega. Aua o le a alu le taimi i ni tagata e o atu e avatu ni tupe ina ia sese ai ona faatino galuega.

Lau Afioga i le Fofoga Fetalai, o le taua ia o le mea lea ua laga mai, i mea nei o matua manao tele. I mea e tataua ona fai i le \$100 ae manao e fai i le \$20,000.

Lau Afioga i le Fofoga Fetalai, o le tali atu lena, o mea uma ia e te fautua mai ai, e taua tele i le faalogologo atu, a o lea lava e ave foi le fautuaga e le tuua.

**FOFOGA FETALAI:** Malo faafetai. E 100 pasene le saunoaga a le toeaina, manino ma malamalama, ae alofa foi le sui usufono sa laga le mataupu lea, ia fesoasoani ifo. E fai sau lauga i le TV e apoapoai le tupulaga, leaga o le mea na i ai...seiloga lava e uma le totogi i le 2 vaiaso faatoa sau foi toe faigaluega. O le a faatali lava la i ai kiliva ma mea faapena.

**Afioga FUIMAONO TEO SAMUELU TEO:** Lau Afioga i le Fofoga Fetalai, afai o le faatagaga lea e aumai, faafetai o lea ua aumai sao le faatagaga e lau Afioga i le Fofoga Fetalai, i lo le mea a le isi aualii, e o lava latou ae leai se faatagaga a lau Afioga. Ia faafetai.

*Na faamaonia le lafo ma faitauina le Tulafono Tau Faaofi o le Ulufale mai o Tagata 2020 i lona faitauga faalua.*

**FOFOGA FETALAI:** E tusa ai ma Tulafono Tumau, o le a tuuina atu le Tulafono Tau Faaofi o le Ulufale mai o Tagata 2020 i le Komiti o Tulafono Tumau, Mataupu tau Faiga palota, Talosaga ma Tofiga faale-Faavae mo le iloiloina ma toe lipoti mai i le Fono Aoao i se Fonotaga o lumanai.

## **LAFO MO LE FAATAATIAESE O TULAFONO TUMAU**

**Susuga Hon TUILAEPA AUELUA FATIALOFA LUPESOLIAI LOLOFIETELE NEIOTI AIONO GALUMALEMANA Dr. SAILELE MALIELEGAOI:** Lau Afioga i le Fofoga Fetalai, ou te tulai atu ma le agaga faaaloalo, *Ina ia faataatiaese Tulafono Tumau 108(4) ina ia avanoa ai le faitauga faatolu o le Tulafono Tau Faaofi, lea sa iloiloina auiliili i le aso Fono lenei.*

*Faaluaina e le Minisita mo Pisinisi, Alamanuia ma Leipa ma le Minisita mo Tina ma Tamaitai, Atinae o Nuu ma Afioga ma Agafesootai.*

*Na faamaonia le lafo.*

## **TULAFONO TAU FAAOFI O LE FAAFOEGA O MALOSIAGA 2020 – faitauga faatolu.**

**FOFOGA FETALAI:** Ou te tapa lau Afioga i le Minisita o Tupe.

**Afioga Hon SILI EPA TUIOTI:** Lau Afioga i le Fofoga Fetalai, e fia momoli atu le faafetai ma le faamalo i le Taitaifono ma sui o le Komiti. Mo teuteuga taua ua manino atili ai le faaleleia ma le faaatoaatoaina o taunuuga ma sini autu o lenei Tulafono Tau Faaofi.

Lau Afioga i le Fofoga Fetalai, ou te faatu le lafo, *Ina ia faitauina nei le Tulafono Tau Faaofi o le Faafoega o Malosiaga 2020 i lona faitauga faatolu.*

*Faaluaina e le Minisita mo Aoga Taaloga ma Aganuu ma le Minisita mo Tupe Maua.*

*Na faamaonia le lafo ma faitauina le Tulafono Tau Faaofi i lona faitauga faatolu ma faapea ona pasia le Fono Aoaofaitulafono.*

### **TULAFONO TAU FAAOFI E SOLOIA AI NI TULAFONO MAI LE UPEGA O TULAFONO 2020 – faitauga faatolu**

**FOFOGA FETALAI:** Ou te tapa lau Afioga i le Taitai o le Maota, le Palemia.

**Susuga Hon TUILAEP AUELUA FATIALOFA LUPESOLIAI LOLOFIETELE NEIOTI AIONO GALUMALEMANA Dr. SAILELE MALIELEGAOI:** Lau Afioga i le Fofoga Fetalai, ou te faatu le lafo, *Ina ia faitauina nei le Tulafono Tau Faaofi e Soloia ai ni Tulafono mai le Upega o Tulafono 2020 i lona faitauga faatolu.*

*Faaluaina e le Minisita mo Pisinisi, Alamanuia ma Leipa ma le Minisita mo Tina ma Tamaitai, Atinae o Nu'u ma Afioga ma Agafesootai.*

*Na faamaonia le lafo ma faitauina le Tulafono Tau Faaofi i lona faitauga faatolu ma faapea ona pasia le Fono Aoaofaitulafono.*

**FOFOGA FETALAI:** Ia, malo faafetai. Malo galulue, malo foi le onosai. E leai lava se faiva e le taunuu i sona taunuuga. Ua maea le tatou galuega faatulagaina mo lenei aso, malo galulue, o le mea sili o lo tatou maua pea o le malosi mai le Atua e faapena ona faatino ai nisi o tiute ma faiva o totoe o lenei aso aemaise foi o galuega i e lua mo le lumanai o le atunuu i ona atinae e manuia ai Samoa. Ae tatou te le i tolopo, ou te tapa lau Afioga i le Palemia pe i ai se mea e te finagalo i ai mo sau saunoaga. A leai, o le a faaiu le tatou galuega.

Ae tatou te le i tolopo e pei ona faatuina ai le lafo, ou te faaiuina le tatou Fonotaga i se tatalo.

*Na tolopo Taulumaga a le Fono Aoaio Faitulafono i le itula e 1:24 i le afiafi seia aulia le Aso Lua, 6 o Oketopa 2020 i le itula e 9:00 i le taeao e tusa ai ma le Polokalame o Fonotaga a le Palemene 2020/2021.*